

Francis le Begue

cf. Karson, p. 53

it

TRAICTE
ET ADVIS
SVR LES DESOR-
DRES DES MONNOYES
& diuersité de moyens d'y
remedier.

DEDIE'

A

TRES-CHRESTIEN ET TRES-
Magnanime HENRY IIII. Roy de France
& de Nauarre.

PAR

F. L. B. Conseiller & Aduocat General
de sa Majesté en sa Cour des
Monnoyes.



A PARIS.

M. D. C.


THE NEWBERRY
LIBRARY

Case
F
39
326
1600^{Le}

EXTRACT DV PRIVILEGE
du Roy.

PAR priuilege de sa Majesté il est permis à
F.L.B. Conseiller & Aduocat general du
Roy en la Cour des Monnoyes, faire imprimer le present traicté des Monnoyes, par telles personnes qu'il vouldra choisir, avec defences à tous autres de le vendre ou Imprimer dans le temps & terme de six ans.
Donné à Paris, le dixseptiesme iour de May,
l'an de grace mil six cens.

Signé, par le Conseil, CROISSET.



Au Roy.



7 R E,

Le joing paternel qui se lit és
actions de vostre Maïesté à
la conseruation & embellisse-
ment de ceste grande Monar-
chie m'à induict & encoura-
gé prendre la plume en main ;
La charge dont il vous à pleu
m'honorer m'y oblige ; & la
necessité extreme des desordres
m'y à astraint & violenté. Non
que ie puisse celer que quelques
considerations ne se soient pre-

sentees pour m'en diuertir. Mais
vostre exemple nous apprend
que nous serions indignes de ser-
uir vn courage si hault, si chose
du monde faisoit trembler &
fleschir la resolution que deuous
auoir au bien & grandeur de
vostre estat, qui me fera tous-
iours passer toutes difficultez. Le
droit de Monnoye est droit de
Couronne & Royal; l'essay, le
pied-fort vous en est deu: Le voi-
cy (SIRE) que tres-humble-
ment ie vous presente, portant
sur son frontispice & emprain-
te, la face & le nom Auguste
de vostre authorité pour luy
donner cours. Si ou la difficul-
té du subiect, ou mon infirmité
n'a Chassé si pres de la perfe-

ction que l'on eust peu desirer, me
servira, s'il vous plaist, l'excuse
des Remedes permis par la ri-
gueur des ordonnances à l'im-
perfection naturelle d'un tel art.
Qui ay osé en remettre le iuge-
ment & à vostre bonté, & à cet
esprit fort & vigoureux dont les
conceptions ne se peuvent à pei-
ne goustier que par leurs admira-
bles & salutaires effects.

D. V. M.

Tref - humble, tref-obeissant &
tref-affectionné subiect

F. L. B.

Sommaire.

P R E F A C E.

Q uelques loix sont muables, & pourquoy.	pag. 1.
Quelle est la loy immuable & eternelle.	3.
Ordre tenu au changement des loix.	3
Science des Monnoyes necessaires aux premiers de l'Estat.	5.
Inconstance des reiglements des Monnoyes, d'où.	6.
Desordres des Monnoyes combien sont.	7.
Des pieces legeres & rongnees.	
E xcessiue quantité en ce temps.	8.
Preiudice & cause de ce desordre.	8.
Remedes du passé au descry entier, ou prisee & estime de leur valeur.	9.
Remedes de poids & bonté en la Monnoye	11.
Des pieces fausses & alterees.	
E N l'effigie d'un Roy imaginaire.	13.
Preiudice & remedes de ce desordre.	13.
Travailler sur le fin.	13. 14.
Diversité de tiltres.	14. 48.
Du billon & meslange de vile matiere en la Monnoye.	
V Sage des precieux metaux.	15.
Commodité ou incommodité du meslage mediocre.	15.
Billon des douzains & son incommodité.	15.
D'où vient l'abondance d'iceux.	16.
Cause du meslange mediocre.	16.
Nous differons des contrees qui ont mines d'or & argent.	17.

Cause du meslange excessif aux douzains. 17.

A quoy & quand bon le descry des douzains. 18.

De la penurie & rareté des Monnoyes.

C*este penurie plus grāde de present que l'on n'estime.* 19.

Cause de la penurie de matiere d'or & argent. 21.

Traffic d'especes s'exerce par le surhaussement que donne l'estranger ou à ses monnoyes ou aux nostres. 22.

Si l'estranger est forcé nous donner argent pour nos fruietz. 24.

Quantité & vilité cause le degast. 25.

Moyens d'attirer argent de ses voisins & d'empescher que bon ne transporte le nostre. 26.27.

Loix sumptuaires. 27.

L'estranger s'efforce de nous donner autant ou plus de marchandises que nous luy en donnons. 29.

Celuy qui a plus de moyēs à le dessus sur son voisin. 29.

Remede contre le surhaussement de nos monnoyes par l'estranger. 30.

Fabrication de francs ou liures especes. 31.

Remede contre le surhaussement que l'estranger done à ses monnoyes. 32.

Si le decry des pieces estrangeres & meilleur que leur exposition au prix & valeur de leur fin. 32.

Preiudice de l'inequalité de valeur de monnoye entre voisins. 33.

Moyens dy remedier. 34.

Du surhaussement & augmentation du prix & valeur des monnoyes.

E*N quoy il a lieu maintenant.* 35.

Son incommodité. S'il raualle, ou s'il continue. 36.

Cause bencherissement & non la penurie. 37.

Effluence d'or & argent cause le vray encherissement.	38.
Incommodité de l'encherissement qui vient du surhaussement.	38.39.
Moyen de desinteresser les creanciers en ce cas.	39.
Impos par vne marque à la monnoye lors des contractz à especes n'est surhaussemēt, & sur qui il porte.	40.
Commodité du surhaussement.	40.
Causes du surhaussement, & par quels moyens il est introduit.	42.42.
Des contractz & introduction des noms imaginaires & de compte.	43.
Abolition des liures ou francs especes.	44.
Douzain ou sol pied fermé de la liure empiré en sa fabrication & pourquoy.	45.
Billon en partie & non seule cause du surhaussement.	45.
Qui cause le surhaussement de l'or de present.	47.
Remedier & empescher le surhaussement.	48.
Comment on pourroit desinteresser les creanciers pour le passé.	49.
Effect de la reduction de l'escu à xxxv. solz, & s'il feroit amander nos necessitez.	49.
Contractz a especes empesche le surhaussement.	50.
Autres moyens de l'empescher.	51.
Compte à escus ne remedie au surhaussement de bestranger.	52.
Fabrication de Henrys.	54.
Fabricuation de monnoye en noms de poidz.	54.
Contractz à especes ou en noms imaginaires & de compte comparez l'un à l'autre en leur facilité ou resistance au surhaussement.	55.



A D V I S

SVR LES DESORDRES

*des Monnoyes & diuersité de
moyens d'y remedier.*



ES LOIX, bien qu'elles soient extraites & tirees de la viue raison tousiours pareille & semblable à soy-mesme, si est-ce que l'experience & suite des choses passees nous fait voir que comme elles sont sacrees & inuiolables en leur temps, ainsi n'y a-il rien eu si frequent entre les peuples, que le perpetuel changement & reuolution d'aucunes d'icelles. Ce qui est arriué, ou parce que nostre iugement esblouy & offusqué des tenebres du corps ne peult pas tousiours discerner la raison solide & veritable d'entre l'opinion vray-semblable & incertaine, sur laquelle ayant quelquefois assis & arresté son suffrage en la composition des loix, il les a faict participer de son incon-

stance : Ou parce que f'estant ceste raison
 meslee avec la prudence au maniment des
 choses humaines pleines de trouble & va-
 riation , luy a esté necessaire par statuts &
 decrets differens , concilier des euenemens
 diuers & fortuits. Et à ce changement f'est
 laissé si souplement porter la sage antiquité,
 qu'ayant pour vn temps creé des Magistrats
 & Tribuns avec pouuoir de s'opposer & in-
 terceder és nouuelles publications des loix,
 l'experience luy en fit gouster & ressentir si
 peu de commodité, qu'elle osa du depuis les
 appeller & nommer *Impedimentum rerum be-
 ne gerendarum*, comme seuls obstacles & em-
 peschemens des bonnes entreprises. Non
 que l'intention de ces anciens ayt iamais
 esté porter si peu de respect aux decrets &
 volonte de ceux qui les auoyent deuancez:
 Mais parce que comme ils scauoient bien
 que l'obseruance de la loy ne despend point
 tant des termes & paroles, que de l'inten-
 tion du Legislatteur, laquelle d'ailleurs ils ne
 pouuoient estimer que tres-juste & tres-sain-
 ctes de leurs peres , Ainsi ne pensoient-ils
 contreuenir aux loix precedentes par vne
 nouuelle loy contraire, s'ils reconnoissoient
 ceste nouuelle loy necessaire au salut & com-
 modité publicque. *Neque enim* (f'excuse ainsi
 vn ancien) *Reip. quod obesset scribere volebant, &
 si scripsissent, cum esset intellectum, repudiatum iri
 legem intelligebant.* Ce que lon dit auoir em-
 pesché Licurgue mettre ses loix par escrit,

à ce que plus ayſément & hors de retractation manifeſte elles fuſſent polies & corrigees en l'eſcole de l'experience, & qu'une ſeule faute ne trainaſt apres ſoy vne longue ſuitte de conſequences & deſordres : Puis-que (comme dict Plutarque) de verité la loy doit commander aux hōmes, non la loy eſcrite, ains la raiſon viue imprimee en leur cœur, *ὅτι ἐν βελιοῖς ἐξω γεραιμυδῖς, ἔδδ' ἐπὶ ξύλοις, ἀλλ' ἐμφυχος ὁν ἐσώλῳ λόγος.* Qui eſt en effect ceſte vraye, incorruptible, & eternelle loy, à laquelle toutes les autres cedent & obeyſſent, & non pas ces Seiennes & Liuiennes, *quæ uno verſiculo Senatus puncto temporis ſublata ſunt.* Ils introduirent donc à ceſte fin certaines formes & moyens à tenir au maniemement & changement de leurs loix, qui ne ſe rencōtrent ſemblables parmy toutes natiōs. Les Locres haineurs de nouveauté n'y ont eſté ſi ſeueres que l'on eſtime : car ils donnoient entree indifferément à toutes perſones és ouuertes de nouvelles loix & expediets, bien que ce fut avec condiōs rigoureuses & funeſtes. Les Atheniens ſe preſentoient en face des ſtatues de leurs Demi-dieux, *πρὸς ἐπωνύμους εἰκόνας*, avec certaines ceremonies. Je m'arreſteray ſur la couſtume de ceſte grande & puiſſante Monarchie Romaine modelle de toute perfection politique. Leur loy plus auſtere & eſtroitte eſtoit de viure ſoubs les loix tant qu'elles ſeroient loix, ſans qu'il fuſt permis

à homme du monde donner memoires ou enseignements au contraire, sinon à certains Magistrats *qui ins habebant rogandi leges*. Et ceux la seuls, pour euitier toute confusion & licence effrence de nouveauté, lors qu'ils festoient apperceuz d'un desordre, pouuoiet proposer en public le texte d'une nouvelle loy, ou la suppression & abolition d'une ancienne: & parce que le iugement s'en deuoit faire par les Comices & assemblee generale, ce texte estoit exposé en place publique par trois iours de marché cōsecutifs qu'ils appelloient *Nundinas*, de neuf iours en neuf iours, & le vingtseptiesme iour passé, le magistrat alleguoit en plaine assemblee ses raisons, cela faict elle passoit par la pluralité des suffrages.

C'est ce que ie me suis proposé imiter pour ce coup en ce discours sur la variation des Ordonnances des Monnoyes, puis que ceste puissance de demander reglements & *rogare leges*, au subiect que nous traictons, semble estre, en la forme que nous viuons, principalement deuoluë au deuoir de nostre seule charge, sous le plaisir de nostre grand & magnanime Prince. En quoy toutefois ie ne desire passer si auant que ces anciens, ains pour le respect que ie porte à ceux que leur charge y appelle, me cōtenter cōme priué & par forme de dispute, sans rien dire ny prononcer maintenant de mon opinion, alleguer de part & d'autre les raisons sur la cōmodité ou incommodité des remedes qui se pourroient

proposer en chose si necessaire & pressée : à ce que comme vn chacun a interest en ceste dispute, & que pour ceste occasion nous auons coustume en tels reglements faire assemblée de personnes choisies és principales compagnies de ce Royaume, ainsi ceux qui auront a donner leur aduis doreseuuant sur ce subiect ne s'arrestent que sur propositions veritables, esclaircies & discutées par la force & regles de la raison, que i'espere leur faire entendre avec toute facilité : sans qu'ils se puissent brouiller & se perdre en vn monde d'erreurs & àmbiguité, ny qu'ils doiuent desespérer de comprendre chose qui tombe sous le iugement & capacité des hommes: Comme aussi ils le doiuent rechercher & recueillir avec autant de curiosité, qu'il leur est à conscience donner leur voix & suffrage sans appareil & science en chose qui nous importe tant.

Ce que i'ay entrepris avec autant plus de confiance & resolution que la necessité semble le requerir, & le soin paternel qui se lit aux actions de nostre grand Roy. à la conseruation & embelissement de ce bel heritage, semble me le commander, lequel n'a peu toutefois auoir effect iusques icy, faute parauanture de n'estre ce subiect assez esclairecy à ceux qu'il se pouuoit.

Ie commenceray donc avec pareille preface que celle de ces anciens au front du tableau qu'ils mettoient en public, *vt si quid*

ius non sit rogari, ne illud sit rogatum. Sans m'ar-
rester ny trembler d'auantage sous l'om-
bre vaine de consideration quelconque, que
celle du tres-humble seruice que ie dois à
sa maiesté & au bien de l'estat, auquel il est
impie de dire rien de iuste & de bon pou-
voir estre contraire: ayant mieux le disant,
si ie le sçay, estre veu complaire aux Dieux
par Religion, que me taisant les violer par
superstition. Qui ne puis desesperer que si
pour ceste fois quelques vns rebutent ces
raisons, me rendant appellant avec le Poëte
Eschyle au temps & a l'Eternité, se pourra
faire qu'un iour l'on y aura parauenture re-
cours.

Pour y paruenir & entrer en dispute, ie
diray qu'il ne se faut estonner de ceste va-
riation & inconstance si frequente qui se lit
és ordonnances de nos peres sur le fait des
Monnoyes; parce qu'a considerer les qua-
litez des medicaments & causes motiues des
remedes que l'on peut appliquer és desor-
dres qui alterent ceste police, aduient qu'ils
se rencontrent & conspirent si mal au bien
vniuersel & particulier ensemblement, que
le plus souuent le remede de l'un est oc-
casion & subiect d'une autre desordre, &
que celuy du particulier interesse quelque-
fois le general: Si qu'en ceste contrariété
nous reste plus faire choix & peser les in-
commoditez du moindre mal, que nous en
promettre & rechercher vne entiere exem-
ption.

Ces maux sont principalement de cinq *Desordres* sortes & especes : Le premier se pratique *des mon-* en l'exposition des pieces legeres & ron- *noyes com-* gnees : Le second en celle des faulses & al- *bien sont.* terees : Le troisieme au surhaussement de leurs prix & valeur : Le quatrieme à l'empirence excessiue, & trop grand meslange de vile matiere parmy l'or & l'argent : Et le cinquiesme en la penurie & rareté des monnoyes. De tous lesquels puis que nous pouuons faire plainte ce Royaume estre de present affligé, semble a propos traicter de chacun separément : avec tel ordre, que nous remarquerons premierement En quoy chacun d'iceux se pratique, & quel il est. Puis le preiudice & dommage qu'il nous faict. En apres la cause d'iceluy, & ce qui l'introduit. Pour en fin d'un chacun particulierement en rechercher le remede : prenant garde surtout n'attribuer à l'un confusément ce qui conuient ou procede de l'autre.

DES PIECES legeres & rongnees.

M'ESTANT proposé en ce traité ne raporter ce qui est ou trop notoire à tous, ou qui a esté remarqué par autrui : ains m'arrester seulement à l'esclaircissement de theses & propositions generales controuuersees de

*Ce mal
quel il est.* present entre nous, Je passeray legeremēt ce
tiltre & les deux qui ensuiuent, pour ne re-
cevoir le subiect qui y sera traicté quē bien
peu de doubte & controuerse. C'est donc
chose trop recogneuē d'un chacun, que l'ex-
position des pieces legeres & rongnees est
plus excessiue & ordinaire en ce temps par-
my nous, que l'on sçauroit remarquer auoir
peut estre iamais esté cy deuant en toutes
nations, iusques a excéder des-ja plus des
trois quarts des payemens; sans que ce mal
puisse cesser de s'accroistre, les choses de-
meurant en l'estat quelles sont.

*Son preu-
dice.*

Dont l'interest neantmoins & preiudice
est d'autant plus insupportable, que dire-
ctement il contreuient à la premiere reigle
de la iustice & equité, qui ne doit remplir &
abuser sa balance de poids leger & trom-
peur, sous la foy de l'auctorité publique: Et
que si a l'infiny les especes rongnees estoient
tolerees, elles s'exposeroient en fin si peti-
tes, quelles fuyroient nostre veuē, & ny au-
roit entre les simples & doubles pieces dif-
ference de poids, qui occasionneroit vne cō-
fusion, pour laquelle reformer, feroit lors le
peuple plus grand perte que du commen-
cement du mal.

Sa cause.

Or cet excez si grand en ce temps procé-
de en general de nos troubles passez, soit
par l'impunité & facilité qui estoit lors de
rōgner: soit par le peu d'ordre que l'on tenoit
en telles confusions aux essais & deliurances
des

des monnoyes, destituees la plus part de vrays & legitimes officiers. Et en particulier par le choix & triage que le marchand forain fait à veüe d'œil de nos fortes monnoyes pour traffiquer vers l'estranger qui les prise beaucoup plus que nous, ainsi que fait pareillement l'orfevre destitué de toute autre matiere estrangere que l'on ne nous apporte plus pour la mesme raison.

Pour à quoy remedier puis qu'il faut pre- *Remedes*
mierement reparer les fautes passees que *au passé:*
penfer a establir vne ordre pour l'aduenir,
(qui ne pourroit estre que confus parmy ceste confusion, laquelle infalliblement croistra de iour en iour sans esperance de temps plus conuenable cy apres, au moyen de la penurie & pauureté qui nous consommera de plus en plus,) ie ne pense pas que pour ce regard l'on se puisse aduiser d'autres moyes que ceux icy; qui seroient ou descrier entierement les pieces legeres au pied & desir de l'ordonnance; ou leur permettre peu pres le remede de poids que l'on estimera plus commun es pieces qui ont cours.

Et parce que i'ay protesté en la preface de ce discours laisser libre le iugement du lecteur; à ce que plus meurement il le puisse prononcer, ie diray ce qu'il me semble de la commodité ou incōmodité de l'un & l'autre moyen. La commodité du premier seroit en l'obseruance & execution entiere de l'ordonnance de soixante dixsept, soit pour *Le premier & sa commodité ou incōmodité.*

l'expositiō des pieces a pareille valeur quelle veut, soit pour le compte a especes d'escus qui seroit entretenu: de laquelle nous dirons tantost la consequence. Son incommodité se resentiroid en la pertē que fera celui qui s'en trouuera saisi, tant sur le foiblage de matiere, que traicte & façon de sa piece qu'il perdra. A quoy l'on pourroit adiouster pour l'interest public, la cōtinuation voire l'occasion belle de transporter alors avec plus de proffit les pieces legeres, que lon ne faict les fortes maintenant, pour la traicte qu'elles s'exposent de plus.

Le second Pour le regard du secōd moïé, Si ce remede
et sa cō- de poids diminuōit autant du prix desdictes
modité ou pieces au pied de ladite ordonnance, sa com-
incommo- modité seroit en l'obseruance d'icelle pour
dité. ce regard seulement, & de sauuer les frais de la traicte. Ayant au reste pareille incommodité que le premier moyen: qui ne voudroit adiouster qu'il interromperoit le compte & especes d'escus. Que si ce remede de poids ne diminuait rien du prix qu'elles s'exposent de present legeres quelles sont, seroit en effect vn vray surhaussement, qui porteroit sur les creanciers comme nous dirons tantost, mais qui releueroit sensiblement le peuple de toutes les incommoditez des autres moyens proposez, nous reseruans en son lieu desdire le reste de ses effects.

Remedes
pour l'ad-
uenir.


Ayant donc ainsi reparé les ruynes precedentes, pour empescher que l'on n'y tombe

plus, sera veu s'il seroit à propos adiouster aux ordonnances de peser & autres reglements sur ce faits, trois ou quatre remedes qui ensuyuent contestez de ce temps. Le premier est de l'ordre à tenir que les pieces soient formees en rond, & quel de ces trois moyens est à preferer a l'autre, Le moulin, le moule, le marteau: ce que nous tairons en ce discours, pour n'estre cette matiere nostre intention. Le second est des remedes permis au maitre de Monnoye, desquels en vn mot la seule tollerance est fondee sur l'imperfectiō ordinaire des arts mechaniques, & dont l'incōmodité se ressent en l'inegalité du poids & bonté des Monnoyes qui les fait trier & billonner, ce que i'estime deuoir estre entēdu des remedes trop grands: Car comme d'une diuision mechanique & manuelle l'on ne peut former vne demonstration Geometrique qui consiste seulement en l'intellect, & qu'il est comme impossible trouuer exactement le poids & chasser precisément iusques au tiltre prescript; ainsi est-il à croire que le maitre de Monnoye y sera plus exact, quand d'une part il verra difformer sans mercy sa Monnoye si elle n'est au tiltre & poids ordonné, & que d'ailleurs il perdra en pure perte ce qu'il y aura mis de meilleur & plus fort; au lieu que se ioüant dans les remedes il ne rend ceste diligence, parce qu'il en est quitte suppleant le default, lequel luy en chault peu le donner ou au peuple ou au

*Remedes
de poids ou
du Maitre
de Mon-
noye.*

Nombre des lieux à fabriquer Monnoye. Roy. Le troisieme est sur le nombre que l'on estime excessif des lieux à fabriquer Monnoye parmy nous, Duquel (sans adoucir Mō. nouier ce trop grand nombre,) Je me contenteray de dire que ie ne puis estre d'accord de ce qu'aucuns ont escrit d'une seule monnoye en l'Empire Romain, qui n'a desnié ce droit à quelques villes & Prouinces particulieres, comme le tesmoigne Ciceron d'Apollonia, & Strabon de la ville de Lyon; Ny que nous puissions nous contenter du petit nombre qui suffisoit lors, pour l'incommodité qui nous resteroit du port & voiture iusques icy, qui donneroit bien tost subiect à ceux qui seroient porteurs des matieres les liurer es Monnoyes plus prochaines de nos voisins, lesquels les recueilleroient volontiers à nostre preiudice. Le quatrieme & dernier qui seroit d'empescher ce triage pour le transport, nous esperons le traicter lors que cy apres nous parlerons de la penurie.

Des pieces faulses & alterees.



I la grande tourmente qui a menacé puis peu de temps nostre monarchie d'une subuersion à laissé de ses ruines au desordre que nous venons de traicter, elle n'en a du tout exempté celuy-cy pour les mesmes raisons, auquel s'y peut remarquer vne inegalité si desreglée que les vnes se sont forgees meil-

leures qu'elles ne doyuent, pour le peu de loisir que l'on eust au commencement trier & separer l'or d'auec l'argent des vaisselles: Les autres au contraire en quantité extreme se trouuent empirees de beaucoup par la licence d'aucunes Monnoyes qui se sont distraites de la censure & iugements des boites & iurisdiction legitime: qui les a faiët precipiter en telle manie que nō contētes de leur reuolte encontre leur Prince naturel, pour perpetuer l'exemple de ceste rebellion, elles ont osé la grauer & empraindre en la plupart des pieces qui ont cours à nostre grande confusion, par l'effigie & legende d'un Roy imaginaire, dont elles ont abusé.

Desquels desfreiglements puis que le pre- *Son preiudice* iudice est pareil que du precedent, outre ce *dice & sa* dernier que nous venons de dire; Et que pa- *cause.* reilles confusions & impunitiez les ont introduits. Semble que l'ordre qui nous presse de remedier au passé, ne peut estre autre que les descrire & interdire entierement. Et pour l'aduenir outre les reglemēts anciens, se peuvent mettre en auant deux ou trois expedients qui ensuyuent lesquels reçoient quelque difficulté. Le premier est celuy que *Moyens d'y* quelques vns ont proposé de trauailler sur le *remedier.* fin, qui seroit rendre (dient-ils) à l'or & à l'argent sa naïfue couleur & naturel son, qu'ils ne pensent estre petits moyens pour reconnoistre & discerner les faulses monnoyes: Auquel l'on peut ce me semble opposer la

crainte qui nous doibt saisir, que l'estranger n'en fust trop conuoiteux, & qu'il ne recerchast de les recueillir auec trop de curiosité, comme nous disputerons au traicté qui ensuit. Le second seroit forger & tailler coings difficiles à contrefaire par la face du Prince qui y seroit empreinte, pour luy estre autant de statues erigees à son honneur, qui les rendroit plus sacrees & inuiolables. *Ommino debet integritas quæri* (dit Cassiodore) *ubi vultus Regius imprimitur*. Et cōme dit cest Empereur. *Quidnam erit tutum si in nostra peccetur effigie?* ce qui defaut à nos escus, quarts, & demy quarts d'escu. Le troisieme seroit ne permettre fabrication de Monnoye qu'à vn seul tiltre & alliage, pour estre ceste inegalité de tiltre subiect & occasion le plus souuent au Maistre de Monnoye couller & passer les reaux & flancs de la foible Monnoye pour la forte, comme des pieces de vingt sols en ceux de quarts d'escu, aux yeux mesme des Officiers.

Du Billon & meslange de vile matiere en la Monnoye.



DA R C E que ce meslange se trouue inegal en nos Monnoyes & que les vnes en sont plus chargees que les autres, cela faict que la plainte & preiudice n'est semblable de tou-

tes. La plainte qui a lieu mesme entre le mes-^{Meslange}lange mediocre, est fondee sur ce que par le ^{mediocre}mediocre poids & place que ce vil metal occupe, il ^{son pre-}semble contrarier à l'usage des precieux me-^{indice-}taux choisis du commun consentement des hommes pour serrer & reduire en moins de lieu & espace le prix & valeur des plus grandes possessions, & faire que sur nous plus commodément & sans charge nous puissions transporter les choses plus pesantes & immobiles, à quoy ne sert de rien le cuyure que nous ne prions pas en ce meslange, ains au contraire faict moins estimer le metal avec lequel il est incorporé par l'aage plus grand que le fin & aduisé Banquier luy donne pour les frais de l'affinage. Laquelle incommodité lon soustient estre compensee par l'interest public, tant à la conseruation des richesses du Royaume, que pour empescher l'orfeure de refondre, diuerty de ce faire par les fraix de l'affinage. Et sur ceste dispute voicy ce qu'en a escrit puis quelque temps vn ^{Au-}theur estrangier. *Principes qui auri argentique fo-*
dinis destituuntur, dilutiorem & debiliorem in va-
lore intrinseco (μεγέθει καὶ ὀλίμῳ dit Arist.)
talem tamen monetam fabricare omnino procurent,
quæ suis requisitis ligæ, ponderis ac formæ præpo-
leant.

D'où se recognoistra que nous n'auons ^{Billon &}Billon pour ce regard subiet de nous plaindre sinon ^{son preiu-}de l'excessif meslange de cuyure qui se void ^{dice.}en nos douzains, qui nous est de verité à im-

portance & preiudice, tant pour l'incommo-
dité premiere de sa place & son poids; que
parce que ce meslange excessif empesche à
bon escient que l'on puisse discerner par la
couleur & le son, les bons & legitimes, d'a-
uec les faux & alterez: qui donne subiect aux
faux Monnoyeurs & Monnoyes voisines en
forger en telle abondance pour leur facile
exposition, que le peuple est contraint à la
crise du mal; lors de son incommodité &
mesualeur recognue, y perdre sur le change;
& les Receptes generalles en courbent
soubz le faix. Qui a fait que quelques vns ont
estimé que procedoit de cela en premiere
cause le surhaussement des fortes, ce que
nous esclaircirons tantost. Contre lesquel-
les incommoditez se peult seulement alle-
guer le peu de corps que lesdits douzains au-
roient sans cet alliage & mixtion, qui se iuge-
ra par l'experience.

*Cause du
meslange
mediocre.*

Or n'est-il ce me semble facile descouurir
d'où le meslange mediocre en l'or & l'argent
à prins source. Qui ne voudroit dire que l'ar-
gent & le cuyure a esté adiousté à l'or, & le
cuyure à l'argent pour les rendre moins mols
& flexibles & leur donner plus de corps. Ou
que quelques mines se rencontrans moins
parfaictes, l'on a negligé faire plus grands
fraiz à chasser plus auant, comme semblent
auoir fait les anciens en leurs medailles qui
nous restent la pluspart à dix & vnze deniers.
Ou que cela a procedé d'un mauuais com-
men-

mençemēt, de l'inuention de q̄lques Cōseillers des Princes qui ont tâché par ce moyen cacher au peuple vne leuee sur la Monnoye, puis qu'il eust esté autrement aussi aysé d'affoiblir, comme semble sy r'apporter l'Edict de Tacite Auguste, *De metallorum confusione.* Ou en fin parce que l'estat des choses presentes du tout different de ces grandes Monarchies Persienne, Grecque & Romaine, qui ne se laissoient esclairer & approcher que de loing, nous faict recognoistre que par ceste industrie l'on conserue la monnoye, & s'efforce-on butiner celle de son voisin. Ce qui nous fait differer de l'Espagne & autres provinces doüees de ces mines, dont la terre empeschee à fomentér en son sein ces riches metaux, luy faict negliger de produire fruiçts & necessitez à la nourriture de ses propres enfans, qui les rend curieux affiner & parer ce metal informe, pour nous attirer au fournissement de leurs commoditez. Au lieu que de nostre part nous debuons curieusement veiller à la conseruation, & que ce butin ne nous soit rauy par autrui, ny diuertý de son vsage par l'orfeure & autre tels mestiers.


Quant est du mēlange excessif des douzains, il est à croire que cet excez luy a esté *Cause du billon.* adiousté pour luy donner corps, qui luy est accreu à mesure que la liure a diminué de valeur. Car comme du commencement la liure fut nom de poids, puis aualuee en monnoye courante par Charles le Grand, & en fin re-

duite en espee d'or qui s'appella Franc, qui a valu en bonté quelque temps plus que nostre escu duquel nous vsons maintenant, & ceste liure eust esté deslors diuisee en vingt sols, comme le sol en douze deniers; il estoit necessaire que ce sol fust alors de bon argent, voire au tiltre de dix ou onze deniers, comme il se void par nos registres; lequel par la suppression ou interdiction desdites liures especes à tousiours du depuis empiré, à mesure que le marc d'or & argent a surhaussé par le nom imaginaire des liures qui receuoient en ce faisant diminution de leur valeur, laquelle le sol a esté contraint de suyure comme la partie son entier, & pour estre ledit sol demeuré seul pied & fondement de leur mesure.

Moyens d'y remédier. Si donc les incōmoditez cy dessus estoient trouuees suffisantes de faire remedier au billon des douzains, puis que cela ne se peut executer que par vn descry de ceux qui sont forgez, & par l'interdiction d'en forger autres que d'argent à l'aduenir; Je ne marresterray plus long temps sur ce remede qui ne reçoit autre difficulté, sinon de prendre garde que pensant releuer le peuple d'une incommodité seulement, on ne le ruine d'une entiere perte par vn descry. Sans que ie puisse cōprendre quel bié peut reuenir de les transformer & conuertir en autre billon qui auroit pareilles incōmodités, & que nous ne sommes aux termes de l'Edit de septante six

que l'on trāsforma les vieux douzains en piéces de six blancs de l'aduis des experts, parce qu'ils se transportoient par l'estranger pour estre plus forts & meilleurs en leur prix que les autres monnoyes qui auoient surhaussé.

De la penurie & rareté des Monnoyes.



LE S maux que nous venons de traicter sont restes & effects de noz troubles, mais celuy-cy que nous voyons prédre cours & s'accroistre par la paix semble estre excogité par l'estranger pour perdre & saper cest Estat par astuce, lequel il n'a peu faire choir & succomber par la violence: Mal si sensible & palpable, que *Quel est ce mal.* les prouinces entierement taries de ces metaux quittét & delaisét leur trafic ordinaire, & abandonnent pour neant au peu d'estrangers qui se presentent le reuenu & cueillette de leur fruiéts, qui fait que nous ne craignōs nous mesmes le degast de ceste propre & naturelle richesse de la France. Et bien que ce mal se resente moins en ceste grande & riche ville, par l'affluence des deniers publics qui y sont consommez & recueilliz, si y est-il en effect plus grand que l'on ne recognoist en apparence, parce que chacun resendant en particulier son incommodité,

la reiette aysement sur l'infortune du siecle precedant, sans voir & prendre garde que disants tous ainsi ou la plus grande partie, s'ensuit que noz thresors ne sont plus parmy nous.

*Leur pre-
iudice.*

Dont l'importance neantmoins & preiudice est de telle consequence, qu'au defaut de ces metaux cesse le commerce & negoce parmy nous, & se dissipe le nerf & la force du general. Si que ce grand & fertile Royau-
me qui deust triompher par son vberté des richesses de ses voisins, se verra dans peu de iours par ces frequētes saignees & attractiōs priuē des fonctions de la vie, si quelque tutelaire genie par vn salutaire remede ne sub-
uiuent nostre extreme langueur.

*Cause de
la penurie
de mon-
noye.*

Or comme ceste penurie est de deux for-
tes, sçauoir ou d'argent & or monnoyé, ou de toute matiere d'or & argent, aussi a-elle di-
uersité de raisons. Le chommage & penurie de monnoye plustost que d'orfauerie procede
partie du luxe en vaisselle & passēmēt d'argēt
indifferemmēt permis, partie de la basse val-
leur de l'or & argent monnoyé en compa-
raison de celuy mis en œuvre; ioint la tole-
rance aux orfeures de refondre monnoye
principalement les estrangeres, ce qui sem-
ble leur deuoir moins estre permis que la re-
fonte des nostres qui ont ja payé au Roy
son droict de seigneurie, & n'auroit in-
terest la Maiesté à la refonte continuelle de
ses monnoyes, lesquelles comme par vn re-

flux y auroit esperance retomber encore vne fois en ses monnoyes, & luy repayer son droict, n'estoit l'incommodité de son peuple qui a interest pour la facilité du commerce que ces pretieux metaux soiét conuertis en monnoye courante.

Quant à la penurie de matiere d'or & argent es pays que la nature n'a doué de telle penurie les mines, elle ne peut prouenir que par faute de matiere d'industrie de l'attirer d'autrui, ou par negligence & facilité d'empescher qu'on ne le transporte dehors. Ce qui se fait par plusieurs & diuers moyens. Le premier & plus violent fut practiqué par ces grandes & puissantes monarchies, lors que leurs exercites rauageoient les nations estrangeres pour sen retourner chez eux chargez de ces pretieuses desponilles, ou par forteresses & garnisons ils cōtraignoient les peuples vaincus leur porter en telles matieres des grands & excessifs tributs: Moyen seul que l'on peut dire auoir autrefois agrandy ou diminué les Empires; au lieu que parmy nous l'on y va plus finement, & avec tant d'industrie qu'il ne se trouue contree tant soit elle sterile, qui n'affluë & ne se rende oppulente de ces matieres. Ce qui se fait ou par eschange de fruiçts necessaires à la vie humaine que la fertilité & bonté d'un pays peut fournir à ses voisins, dont la France moyennant vn bon ordre se deubt infiniment preualoir: Ou par l'eschange de certaines denrees inu-

tiles & de luxe que l'industrie plustost que la nature fait produire, comme les soyés en Italie & Leuant: Ou par les manufactures & œuvres de mains des artisans ingenieux & en quantité: Ou par le trafic des marchandises estrangeres, dont le butin & profit se rapporte en la demeure & enrichit la maison: Ou par les entremises en noz affaires & negoces par les estrangers qui sçauent bien en transporter les despouilles au lieu de leur naissance, principalement lors que le gain au trāsport les y excite: Ou en fin par vn pernietieux trafic d'or & d'argēt qui peruertit & altere tout autre commerce & police, comme le preuoyoit bien la Republique Romaine, laquelle en partie à ceste occasion entretenoit sur mer vn Capitaine super-intendant de la marine. Ce qui est entre nous autant dangereux que pour estre moins recogneu Il en est plus frequent & facile, faute de resistance & opposition.

*Le surhaus
sement de
nos voisins
en leur
monnoye.*

Le moyen duquel l'estranger s'ayde pour y paruenir est le surhaussement de prix & valeur qu'il dōne ou à ses monnoyes à l'esgard des nostres, ou aux nostres propres à l'esgard du prix que nous leur dōnons. Par la plus valeur des siennes il suscite les billōneurs acheter de nostre peuple ignorant nostre bōne & forte monnoye qui n'est maintenant qu'en escus, ou ses parties (lesquels nostre peuple ne peut & n'auroit profit de surhausser parmy luy, attendu qu'il les doit en espe-

ces par les obligatiōs:) Laquelle lesdits estrangers transportent chez eux en grāde quantité pour le peu d'eschange qu'ils nous font de la leur plus foible & empiree & en moindre quantité par vn continuel billonnement & refonte, lesquelles siennes monnoyes ils surhaultent à leur volonté parce qu'elles ne portent le nom d'especes esquelles nos contracts sont conceuz.

Et par la plus valleur des nostres propres il *surhausse-*
induit & attise nostre peuple les y porter à *ment par*
foule iusques chez luy par forme de trafic au- *les voisins*
quel il gaigne plus qu'en nul autre, soit pour *de nos pro-*
l'opinion qu'il a en rapporter plus grande *pres mon-*
quātité de marchādises, soit qu'en effect il en *noyes.*
acquitte plus grandes obligations, lesquelles
il recherche & achapte curieusement de delà,
pour en recepuoir de deçà le payement en-
tier en plus grande quantité d'especes; Et sera
veu si le feroit point encores plus volon-
tiers, si en l'estat que les choses sont l'on ve-
noit à descrire les legeres dont le peuple se-
roit forcé se deffaire; Et si ceste tollerance
nous conserue point attendant vn reiglemēt
soit par deffences expresse de transporter ou
autrement, ce peu de matieres qui nous re-
stent en pieces legeres & vaisnelles, pendant
que celles d'or & les fortes d'argent se trans-
portent à outrance. Qui ne debuons par ce-
ste continuatiō attendre en fin autre miseri-
corde des legeres, que celle du Cyclope à
Vlysse dans Homere en faueur de son bon

vin. & τὸ ἐγὼ πῦματον ἔδομα. Je te mangeray (dit-il) le dernier de tes compagnons.

*Si le sur-
haussemēt
par l'estra-
ger nous
peut espuis-
ser nostre
or & ar-
gent.*

Moyen qui a tousiours esté recongneu si veritable & de telle importance à l'entier espuisemēt de nos richesses, que par plusieurs traictez de paix a esté expressement accordé entre l'estranger & nous qu'il ne fera loisible surhausser la monnoye qu'à l'esgard l'un de l'autre. Qui a faict dire à quelques vns (que ie n'ose toutesfois approuuer pour le preiudice & confusion qu'il introduit d'ailleurs) que nostre France s'est tellement par ce moyen garentie de la rapine de l'estranger, pendant trente ou quarante annees precedentes l'ordonnance de soixante dixsept & lors de l'ordonnance des Roys François & Henry son fils, qu'il est admirable de nombrer la richesse qu'elle auoit lors amassé plus grande six fois qu'elle n'auoit fait en trois cens ans auparavant, laquelle les mesmes soustiennent luy auoir esté entierement du depuis rauie, pendant que nostre peuple a esté faulte de ce moyen retenu de butiner l'opulence estrangere, & qu'il a eu les mains liees à la resistance qu'il pouuoit faire au transport de la sienne.

Obiection.

Ce moyen de transporter neantmoins ne laisse d'estre debatue par plusieurs qui soustiennent que l'estranger n'a rien à nous donner, & que force luy est nous apporter argent pour eschange de nos blés, vins, & autres commoditez que la fertilité de la France nous produit.

Mais

Mais bien qu'à cela le chommage des monnoyes; le rapport des tesmoins que nous oyons qui desplorent le degast, profusion & refonte de nos monnoyes és pays estrangers, sans que voyons que bien peu dés leur en eschange; & la penurie que nous souffrons par experience, semble y satisfaire suffisamment. Sera pris garde combien peut l'opinion & instigation sur le commerce, & combien l'esperance de proffiter a de force sur le marchand pour l'induire remplir vn pays de certaines denrees en vn temps plus qu'en l'autre. Qui faict que l'estranger tirant proffit de nostre monnoye, nous comble en eschange de marchandises inutiles & nouuelles, ou nostre humeur naturellement nous porte iusques au degast; au lieu que la friandise du gain & interest excessif qu'il fait de nos metaux le rend tardif a emporter noz denrees, la penurie desquelles leur empesche le degast qui leur estoit autrefois plus frequent, comme l'abondance de celles qui nous restent nous y inuite; ainsi que l'aduoua Platon à Aristipe, qui cessa de se plaindre de la quantité du poisson appresté quand on luy eust dit la vilité du prix. Ce qui n'arriueroit si ceste raison cessoit, & que le commerce des marchandises allast son cours selon la necessité que l'on en auroit.

Or ce n'est rien d'auoir fondé nostre mal, Moyès d'y & recherché soigneusement son origine, si remedier, nous ne mettôs peine y subuenir proptement

& empescher qu'entierement il ne nous perde & consume: Pour en parler par ordre nous auons remarqué ceste penurie de deux sortes; ou de monnoyes simplement, ou de toute matiere d'or & argent, qui est la plus dangereuse. Pour le regard du premier auquel le Roy & le peuple ont interest, Je tairay les moyens qui se sont proposez contre ceux qui diuertissent trop impunément (dit-on) ces pretieux metaux de leur vsage propre, Ensemble ceux contenus aux ordonnances qu'il reste seulement de faire obseruer. Pour venir a nostre pauvreté & manque de matiere laquelle nous auons dit prouenir, ou faute d'attirer de l'estranger; ou pour n'empescher le transport des nostres qui sont portes d'entree & dissue qu'il faut diuersement garder.

*Pour attirer d'au-
truy.*

Nous attirons principalement de l'Espagne dont la sterilité n'a qu'eschanger a nostre abondance sinon ces mines precieuses, qui fait que par ordonnance du pays elle nous les prodigue volontiers par passeport; & neantmoins arriue de nostre temps que le marchand induit de l'interest qu'il fait au trafic de ces metaux, transporte les nauires chargees de ces riches despouilles, qu'il a eu de l'Espagne en eschange de nostre bled, iusques en Flandres & pays circonuoisins qui les prisent plus que nous, & nous remplit en leur lieu de marchandises inutiles,

desquelles derechef ils espuise nostre argent. Pour à quoy remedier sera veu s'il seroit point à propos ne permettre aucune traicte, sinon a condition de fournir par les marchans aux Monnoyes du Roy les plus proches des ports, comme premiers bassins destinez a recevoir ceste douce pluye, le prix entier de leur bled en monnoyes estrange- res, & ce par bonnes & suffisantes cautions, & sous grandes & rigoureuses peines.

Mais ce n'est rien l'attirer par ceste por-
 te si nous ne le gardons de sortir, qui n'est
 pas petit affaire pour la quantité des Prin-
 ces & Republiques souveraines es environs
 de nous. Pour y parvenir & retrancher le
 mal par sa cause, laquelle est besoin repe-
 ter, Passant sous silence l'effort & violence
 des armes: Comme l'octroy des Annates a sa
 Sainteté, & solde que no^r donnōs aux estrā-
 gers, Je croy que les moyens qui ensuiuent
 sont tres-necessaires & importans. Qui se-
 roient empescher & forclorre a l'exemple des
 autres nations plus qu'il sera possible, tout
 estrange ou du moins celuy qui n'aura ar-
 resté sa fortune parmy nous de l'entremise
 de nos affaires & finances; Punir capitale-
 ment le transport des monnoyes; deffendre
 l'entier apport des manufactures qui rend
 nostre peuple negligent, ensemble celuy des
 marchandises inutiles; Et sur tout faire ob-
 server tres-estroitement les loix sumptuai-
 res des habits, dont l'execution est beaucoup

*Pour em-
 pescher que
 nostre mō-
 noye ne soit
 trāsportée.*

*Loix sum-
 ptuaires.*

plus facile que celle de la deffence d'apporter matieres, qui se coulent furtiuement par des endroicts & moyens quel'on ne se doute pas; A quoy ceux qui tiennent la police doivent veiller avec autant de diligence & affection, que de ce seul moyen despend vne partie de nostre grandeur, richesse & prosperité, puis que la rencontre de ce luxe s'adresse si mal à propos enuers nous, que celui qui nous le donne & fournit iusques a plus de millions d'or chacun an, ne tire en eschange pour dire chose du monde de nous que nostre or & nostre argent.

Oster la
cause du
mal.

Tous lesquels remedes nous estimerions de verité suffisans, n'estoit la resistance de nostre humeur libertine qui ne borne sa despence que par la bourse, pour le regard de laquelle (comme respondit Platon aux Cyreniens) mal-aisément lon peut *Condere leges tam fœlicibus*. A quoy l'on pourroit adiouster qu'il est tref-dangereux en chose si importante s'asseurer & arrester à la deffence seule & interdiction, tant que la contrauention est assistee de moyens qui seront tousiours tres-faciles, & attisee de proffit & auarice; qui ne deuons estre si soigneux que les delinquans soient punis, comme de rechercher quel'on ne puisse ou vueille plus faillir. *Non tam cogitandum* (sagement opina le ieune fils de Porfena deuant Rome) *quot & quibus uti debeamus custodiis, quam quo modo efficiendum ne ullis opus sit custodiis*. Retran-

chons le motif & opposons nous à l'occasion de laquelle l'estranger pippe celuy qui trafique, nous osterons ce mal & ferons que nous ne verrons plus tant de ces bagatelles, comme pareillement l'estranger viera plus librement de nos necessitez lors qu'il s'en verra en abondance: Et l'un & l'autre se fera quant le trafic aura son cours ordinaire, & que l'on ne pensera plus au profit & trafic pernicious des especes, qui ne semble pas pouuoir estre entierement empesche par les seuls moyens que dessus, lesquels bien qu'il fussent entierement executez & observez, (ce qui est mal-aisé) tousiours le moyen nous manqueroit de nous deffaire de nos bleds, vins & autres necessitez, lesquelles nous ne pouuons astraintre l'estranger acheter, ains l'allecher seulement, qui en sera neantmoins diuert plus qu'il pourra tât que l'apprehension luy restera de perdre excessiue-ment sur sa monnoye. Comme de fait ledit estrange hors mis l'Espagnol n'est tellemēt necessité de nous que nous ne concertions ensemble qui se donnera plus de marchandises ou manufactures pour tirer l'argēt de son voisin, & comme il nous peut remplir de marchandises inutiles & manufactures que nous mesmes pourrions ouurer, ainsi pouuons nous les combler de luxe & excessiue *Celuy qui* abondance de vins & autres fructs qu'ils *a plus de* consommeront plus volontiers iusques au *moyen a le* degast. Soit donc ainsi que nous ayons defen- *dessus.*

du le luxe, le trafic, le transport d'or & argent, & autres moyens cy dessus, qui sont de verité tres-necessaires, Nous deuons nous asseurer qu'ils vseront des mesmes moyens à l'un & à l'autre communs, voire les feront mieux obseruer que nous, outre lesquels semble que celuy qui aura de son costé la plus valeur de ces metaux par laquelle il allechera l'estranger luy porter son or & argent & conseruera le sien, sera du moins en cela plus fort que son voisin, sur lequel infalliblement il emportera tousiours le dessus.

Puis que donc ne semble pas que ces remedes puissent suffire, & que d'ailleurs ce mal nous importe de nostre ruine entiere, C'est icy que i'exhorteray tout esprit veritablement François, cōtribuer a ceste mienne recherche ce qu'il pourra de meilleur, & prendre en bonne part ce dont nous nous sommes aduisez. Nous auons dit que ce mal provenoit du surhaussement que l'estranger donne à ses monnoyes a l'esgard des nostres qu'il refond, ou aux nostres propres a l'egal des sienes (hors mis le seigneuriage d'auantage qui ne nous peut preiudicier grand qu'il soit, parce que le marchāt & billonneur n'en fait profit.) S'il ne se fust aydé que de ce dernier moyen, bien qu'il nous espuise & interesse estrangement, & qu'il abuse infiniment nostre peuple & le marchand, si penserois-ie m'estre aduisé de l'vnique remede que ie submets a la censure des experts.

Seroit d'abolir entieremēt les noms ima- *Abolir en-*
ginaires de liures & de sols qui luy restent *tieremens*
seuls pour exprimer ce surhaussement à no- *les noms*
stre preiudice; attendu que s'il pensoit s'ay- *imaginai-*
der d'autres noms desquels la significatiō po- *res & de*
sitiue nous seroit incogneuē & hors d'vsage, *compte.*
en vain il s'en seruiroit en vne cōparaison de
valeur que nous n'entenderiōs pas: Ce que ie
n'entens de l'aualuatiō desdites liures aux cō-
tracts parmy nous, cōme semble auoir intro-
duit l'ordōnāce lxxvij. Mais d'en esteindre l'v-
sage & memoire entierement enuers l'estran-
ger, qui n'a esté empesché par ladite ordonnā-
ce à laquelle il n'est astraint s'en seruir au sur-
haussemēt du marc, par lequel il trāsporte les
lingots & marcs entiers d'or & d'argent, cō-
me il faict nos especes par le surhaussemēt en
douzains. Ce que ie croy se pouuoir execu- *Fabricatiō*
ter par la fabrication seule de francs ou *de liures*
liures & sols especes à mesme tiltre qui es- *ou francs*
galleroient & payeroient les liures & sols *especes.*
denommez en nos contracts, sans que par-
my nous l'on fabriquaist autre monnoye, la-
quelle pour quelque ruse que s'aduifast le-
dit estrange, luy seroit impossible de sur-
hausser sinon par vne refonte chez luy dont
nous parlerons tantost; attendu que les noms
imaginaires seuls & vniques moyens de sur-
hausser vne espee ne seroient lors non seu-
lement defendus parmy nous, & comme
bannis & liurez en la possession estrangere
pour nous faire la guerre, ains esteints, en-

seuelis & transformez en especes solides tant enuers luy qu'enuers nous, qui feroit que nostre peuple luy diroit lors comme Diogene à Platon de ses Idees. *τεἀπεζαν ὡς καὶ κωὰθον ὁρῶ. τεἀπεζότιτα δὲ καὶ κωὰθότιτα, ἔδαμῶς. Mensitates & cyathitates non video, mensantē & cyathum video.* Ce qui réussiroit comme i'espere si heureusement que sil nous estoit possible aduiser d'un remede aussi souverain contre la ruse & malice de sa refonte, que nous auons dict estre le premier moyen dont il vse, i'estime que doreseuuant nous nous mocquerions de son surhaussement.

Remedier au surhaussement que l'estrange donne a ses monnoyes. Puis que toutesfois ce seul filet nous tient en ce dernier accez, ne semble pas qu'il soit honnesté abandonner ceste cure. L'on pretend y remedier par le descry des pieces estrangeres, lequel à autrefois esté estimé plus à propos que l'exposition d'icelles au prix seulement du fin des nostres, à cause de la facilité de l'obseruance du descry par confiscation de toutes pieces qui se trouuerroient en posselliō d'aucuns, dont la descouuerte est de verité plus aisee que celle de l'exposition plus haute que l'ordonnance, qui se peut plus facilement cacher & celer par conuentions particulieres & es secrets des maisons: Mais bien que l'un ou l'autre moyen ne puisse se pas estre reietté, si est-ce que ie n'ose asseurer qu'il puisse entieremēt suffire. Car outre qu'il seroit mal-aisé le faire obseruer par le peuple tant qu'il y fera vn profit excessif

& apparent, principalement sur les frontieres & entre les billonneurs; l'estranger au pis gardera ou exposera ailleurs & par les autres prouinces sa monnoye, laquelle avec profit il aura fabriqué de la nostre; qui ne remedieroit aucunement au mal; comme en effect nous voyons de present si peu que rien & sans proportiō quelconque de pieces estrangeres; au lieu que pendant les desordres précédans lxxvij. il estoit admirable du nombre qui se voyoit entre nous, bien que elles y fussent exposees à plus haut prix qu'és lieux ou elles estoient forgees.

Ce qui me fera veritablement demeurer *Inequali-*
court, & me contenter de produire comme *té de mon-*
pour excuse & deliberation ce qu'entre au- *noye entre*
tres ont ingenuement déclaré par escrit ces *voisins.*
trois Autheurs sur ceste inégalité de mon-
noye entre voisins: Budee, *Tametsi poteramus*
citra reprehensionem aurum argentūque ex tēporis
huius conditione aestimare &c. Cuius rei lūculenta
testimonia proferre possem, si quorumdam quæstus
immodicos commemorare vellem ex collybo factita-
tos dum in Italia res gessimus, aureis tunc nostris
vice mercis exportatis. Vn Autheur estrange.
Utinam hæc nostra tempora in ipsa intrinseca valua-
tione concordarent, & peu apres. Quod ut utile ac
necessarium; ita sanè exoptādum iudico atque sentio.
Et plus disertement ce dernier autheur de
nostre temps. *Romana moneta olim fixa & pre-*
cium, nos variare est necesse: quia undique provinciis
cingimur, nec aliter fraudes eorum, dolos & artifi-

Remedes *cioſa commenta vitare potuimus.* Laquelle eſgali-
cōtre telle té il eſt impoſſible eſſectuer que par l'un des
inegalité. deux moyens qui enſuyuent. Le premier
ſeroit aſtrindre l'eſtranger par le credit &
auctorité de noſtre grand Roy r'amener le
prix de ſes monnoyes à l'eſgal de celui que
nous donnons aux noſtres, & qui eſtoit par-
auant la conſuſion de nos troubles, confor-
mément aux traictez de paix, à quoy nous
exhortons tres-humblement ſa Maieſté. Le
ſecond ſeroit executer parmy nous ce qu'il
n'auroit voulu conſentir chez luy, & eſgaler
le prix des noſtres aux ſiennes: que ie laiſſe
au iugement & liberté d'un chacun choiſir
ou reietter, attendu le ſurhauffement qui
ſ'en enſuyuroit continuel, comme l'on diét,
par l'opiniaſtreté de l'eſtranger à noſtre ruy-
ne, qui ſurhauffera touſiours pour le profit &
intereſt qu'il en reſſent, Laquelle de verité
n'ayant peu cy deuant faire fleſchir celle que
nos peres ont eſtimé deuoir à noſtre prote-
ction, à en fin fait monter nos monnoyes
en ceſte haulte valeur que nous les voyons
par les ordonnances. Et à fin que plus fai-
nement on le puiſſe deliberer, ie me con-
tenteray inſiſter ſeulement ſur le preiudice
de ſa commodité ou incommodité, com-
me ſemble nous y conuiſſer l'ordre que nous
nous ſommes preſcript au commencement.

*Du surhaussement & augmentation
du prix & valeur des
Monnoyes.*



VIS que nous auons recogneu par le traicté precedent que l'estranger se sert du surhaussement pour butiner nostre richesse & accroistre la sienne, & que pour pareille raison il pourroit estre vng moyen de nous garentir contre luy, semble que nous en deuions parler comme de chose indifferente, & que toute ceste dispute doibt tomber sur le choix, preference & es- *En quoy il a lieu.* lection de ses commoditez ou incommoditez: presupposant comme chose recogneüe qu'il n'a lieu maintenant enuers nous que sur les pieces estrangeres; trafic de toutes nos Monnoyes pesantes, escus & pieces d'or; & exposition d'une excessiue quantité de legeres & billon empiré, qui est vne espece de de surhaussement.

Pour donc recognoistre premierement *Son prei-* son incommodité & sur quelles personnes *dice & in-* elle porte parmy nous, laissant celle que *commodi-* celuy de l'estranger nous faict au general: *ré.* S'il est tel que son excez necessite vn rauall-
ment, & qu'il vienne de la part du Prince, ne *s'il rauale.*

se peult nier que ce ne soit vn tribut autant plus inegal qu'il est cottizé sans discretion ny prudence, en ce qu'il porte sans consideration du riche ou du pauvre indifferemmēt sur ceux qui se trouuent chargez de monnoye lors du descry. Que sil vient de la part du peuple effrené, en effect la perte du rual est compensée par le gain & proffit du surhaussement precedant, mais non sur les mesmes personnes, ny le plus souuent sur les plus riches & aysez. En quoy comme au premier sy recongnoist vne extremesine inequalité, qui a donné lieu à la hayne qu'on luy porte, & aux serments solempnels de ne le permettre, pour auoir quelquesfois occasionné la ruyne entiere des familles, comme il fut veu en l'année soixante dixsept.

S'il continue.

Que sil est tel qu'il continue, on ne laisse de le faire communément ensuyure de deux incommoditez, l'vne en ce qu'il occasionne l'encherissement, l'autre qu'il faict que l'estranger nous donne moins de son or & argent qu'il ne faisoit en eschange de pareille quantité de commoditez qu'il tire de nous, & par ainsi nous cause vne penurie.

Raisons qui ont fait triompher les plus experts en leurs discours, bien qu'elles soient directement contraires & incompatibles.

Car cōme la derniere repugne à l'effect du *ne cause la* surhaussemēt estroictement interdict par les *la penurie-* traictez de paix qui le presuposent tous estre vn moyē d'espuiser les richesses l'vn de l'autre

côme le pratique l'estranger à nostre preiudice. Ainsi est-il incôpatible de dire que le surhaussement occasionne l'encherissement, & que neantmoins l'estranger pour tirer mesme chose de nous, nous donne moins de son metal; puis que l'on est d'accord qu'il trouue nostre chose encherie ainsi & a proportiô que luy auons surhaussé la monnoye. Sans que ie puisse comprendre à quel suiet quelques vns ont maintenu aux discours tenuz és publiques assemblees de soixante dixsept, qui se trouuent imprimez, que l'estranger encherissoit ses velours & denrees à l'occasion de nostre surhaussemét, & que pour nostre regard nous diminuions le prix de noz necessitez; puis qu'en l'un & en l'autre y a pareille raison, sinon lors que quelque extraordinaire fertilité les rend plus viles au respect des anneés precedantes plus steriles. En quoy se cote le mesconte & paralogisme de la comparaiſon qui deuoit estre prise entre choses pareilles, estant aysé de veoir que lors de ladiète fertilité le prix de noz necessitez eust encore esté moindre si ledit surhaussement des especes ne fust suruenü,

Reste donc seul le preiudice de l'encherissement, qu'il faut ingenuëment recognoiſtre proceder en partie du surhaussement: Mais non pas luy seul en estre cause, puis qu'à vray dire l'encherissement qui vient de ce surhaussement n'est que chose imaginai-

*Cause l'encherissement
imaginai-
re.*

Vray en- uient par l'affluance & apport de ces riches
cheriffemēt metaux, lesquels, pour estre plus communs
dois proce- s'eschangent en plus grande quantité con-
de. tre les autres necessitez que la terre ne pro-
 duiēt plus prodigalement: Et est veritable
 de dire que les grands thresors des Indes
 que l'Espagne à departy & faict deriuier par
 l'Europe nous a occasionné l'encheriffemēt
 des choses, ou amendement de l'or & argēt,
 & que pour pareille quantité d'or & argent
 l'on ne pourroit pas maintenant achepter
 moitié de ce que l'on eust peu faire y a trois
 cens ans: Qui a faict que lors de la naissance
 ou declin des Empires les choses ont esté
 de beaucoup diminuees de prix, comme il se
 veoit en la prisee des biens des Libertins du
 temps de Iustinian, qui ordonna qu'en
 leurs successions *pro mille sestertijs unus au-*
reus computaretur, & autres exemples fre-
 quents dans les histoires; comme au contrai-
 re le grand prix de toutes choses a esté ar-
 gument certain de leur ayse & grandeur par
 l'affluance de ces riches metaux; *Maiore sin-*
gularum arborum reditu (au dire de Pline) *quam*
erat apud antiquos prœdiorum.

Incommo- Puis que toutesfois chasque cause fait ne-
dité de l'en cessairement son effect proportionné à sa
cheriffemēt force & puissance, & que outre le vray en-
qui vient cheriffement par l'affluance de ces metaux,
du surhaus il est à croire que la diminution de precieux
sement. metal en la liure ou sol augmente le nom-
 bre des liures & sols en la prisee de la cho-

se, ce que nous appellons encherir, Reste de veoir si cest encherissement est vn mal ou chose indifferente, & en quoy il consiste, ou ne consiste pas. L'incommodité de cest encherissement ne touche en rien ceux qui contractent, traficquent & negocient souz mesme siecle & mesme valeur des especes au temps de l'obligation & celuy du payemēt, par ce que en effect ceste moindre ou plus haute exposition de monnoye est chose simple & populaire, laquelle demeurant vne & semblable, vest & s'attribuē le nom d'une valeur plus exquise dont le peuple se repaist & se laisse abuser, demeurant au reste entre le cuiure, l'or, l'argent & la chose, mesme proportion de quantité qui estoit au parauant. Tout l'interest regarde seul ceux qui ont contracté soubs vn siecle passé & diuersité d'exposition de monnoye, lesquels toutes & quantes fois qu'il a esté permis payer en especes moindres que celles portees par les obligations, ont autant de fois receu moins que leur legitime deu, au moyē de l'encherissement suruenū par ledit surhaussement, qui cause vne disproportion entre les necessitez qu'ils ont a recouurer & les sommes conceuēs és obligations, rentes & cens annuels : Si que les creantiers pour faict de prest ou marchandises ne peuvent à la rigueur estre hors d'interest que par vne aualuation despeces; comme les obligations foncieres par vne reapretiation, qui

est en effect le seul secret & preiudice du surhaussement.

*Marque à
la monnoye.*

Car pour le regard du profit que le Prince tire pour quelque necessité qlquefois sur la monnoye par vne marque qu'il y fait apposer & empraindre, ce n'est proprement vn surhaussemēt ains vn tribut, puis qu'au partir de la il n'est plus pēmis l'exposer à plus haut pris quelle estoit; qui est le seul moyē neantmoins dont le Prince peut s'ayder pour faire que par icelles le creancier ne soit intéressé, Et duquel seul aucuns de ceux qui persuaderent l'ordonnance soixante dixsept, peuuent estre entendus auoir parlé quand ils ont dit, Que si le Roy par quelque necessité se voyoit contraint surhausser ses monnoyes, au moyē de ladicte ordonnance le creancier ne pourroit rien perdre, par ce que le débiteur seroit tousiours obligé luy payer les escus especes desmōmez en son obligation; En quoy ils ont iugé quel plus iuste tribut leur sembloit celuy qui porteroit sur les creanciers (ie dy ceux esquels en fin de cōpte il est plus deub qu'ils ne doiuent) ou indifferemment sur ceux qui auroient argent en leur possession lors de l'Edict.

Commodité ordinaire du surhaussemēt.

Ce que dessus estant dit de l'incommodité du surhaussement, & que l'ordre que nous nous sommes prescrit requiert que nous recherchions fil à point quelque commodité, Je diray qu'il ne semble pas que l'on en puisse ordinairement retirer autre fruiet que

que ceste descharge induë du debteur en par *Commodi-*
ticulier, & le bië que nous auõs dit cy dessus *téextraor-*
du general pour butiner la richesse estran- *dinaire du*
gere, & empescher que la nostre ne nous *surhausse-*
soit rauie: Sinon pour reparer quelquefois *ment.*
vne perte ja arriuee par des confusions &
desordres precedans, laquelle quelques vns
ont estimé ne pouuoir estre plus facilement
portee que par ces riches creanciers; à l'e-
xéple des loix aneïenes d'Amnistie, des nou-
uelles tables, prisee des champs par Iul. Cæ-
sar, du surhaussement par Solon de la mine
en cent drachmes qui n'en valoit au para-
uant que septanté & trois, & de celuy des
Romains en la seconde guerre Punique *dum*
as sextentarius factus est, ac deinde vncialis, &
celuy de l'Empereur Alexandre en la leuee
des tributs & imposts lesquels il ayma mieux
diminuer iusques à la trentiesme partie par
affoiblissement despeces, que diminution de
sommes & quantitez, *ut manerent antiqua ve-*
tigalia (dit Lampride.) De façon que par ce
surhaussement l'on pourroit peut estre pre-
tendre pour ceste fois, outre le remede con-
tre l'inegalité estrangere qui nous importe
infiniment, releuer le peuple de la perte qu'il
fera sur le descry necessaire des pieces lege-
res qui ne luy sera si sensible; faciliter le moyë
refondre les pieces alterees pendât les trou-
blés & forgees sous le nom d'un Roy ima-
ginaire, pour esteindre ce crime de maïesté
parmy nous; Et en fin trouuer moyen des-
charger le peuple de ceste excessiue quan-

tité de douzains sans qu'il fasse aucune perte, ce que ie laisse au iugement de qu'il appartiendra.

Causes du surhaussement & par qui. Ne faisant donc estat de cecy comme de chose arrestee, poursuiuant l'ordre que ie me suis prescrit semble estre temps recercher les causes dudit surhaussement, pour en fin voir quels en sont les remedes. Il ne peut estre introduit que de la part ou du Prince, ou du peuple, ou de l'estranger. Du Prince par forme de tribut pour subuenir a ses necessitez, qui a esté autresfois si excessif que le peuple forcé quelque temps apres reuenir a son premier compte y a fait tant de perte, que sa plainte a taché la memoire de qlques Roys, & à causé quelquefois des rebellions. Le peuple, qui peut infiniment sur la mise des monnoyes fil n'est retenu d'une bride & auctorité, luy attribue vne plus-valeur soit au payement de ses debtes lesquelles par ce moyen il acquitte de moins d'especes, soit en l'achapt de ses necessitez sur l'opinion qu'il a qu'elles luy coustent moins faisant valloir sa piece de monnoye plus grand prix. L'Estranger, soit le Prince, soit le peuple, fait le mesme pour les mesmes raisons chez luy : Mais outre cela depuis que tant de petits Princes souuerains se sont approchez l'un de l'autre & se sont venus loger à l'environ de quelque riche & opulant Empire, ils se sont aduisez de ce moyen pour butiner l'un sur l'autre & sur le plus opulent ceste precieuse richesse,

que nous auons esté contraincts de fuyure pour nous en garentir.

Ce que les vns & les autres ont executé par plusieurs & diuers moyens. Les Princes s'en sont seruis par la fabricatiõ en leurs monnoyes de matiere vile & de peu de valleur, comme de cuyure, cuir dont parle Seneque, & comme il fut practiqué par Frideric qui la retira par apres, plomb & papier, comme il se veoit en quelques autheurs: Puis par l'empirance, affoiblissement, & marque adioustee & empreinte sur toutes especes au moyen de laquelle ils en ont permis l'exposition plus haute. Desquels moyens puis que le Prince en tire commodité, & que de rien l'on ne peut tirer rien, est de necessité que ce subside porte sur l'un de ceux que nous auõs dit. L'Estranger se sert ou de la refonte, ou de noms imaginaires & de compte comme nous, qui fera que nous en traicterons ensemblement.

Nostre peuple donc semble auoir prins Par ceste occasion par la deffence qui luy fut faite du temps du Roy Philippes, & depuis par les Roys François premier & Henry son fils, de plus contracter en especes, ains en liures & en sols, qui estoient par consequent deslors imaginaires; ce qu'ils n'ordonnerent à si mauuaise fin que s'efforce nous le faire croire Dante Poëte Italien: Mais pour empescher la fraude des vsures, ainsi que le porte le texte de l'ordonnance dudit Phi-

lippes du samedi deuant la Chandeleur l'an mil trois cens onze, à Montargis. Par laquelle appert que ces anciens, ou ne preuoyants pas l'interest cy dessus du creancier au surhaussement, ou desirants tant qu'il leur estoit possible soulager le debteur, estimerent que ceste caution & preuoyance du creancier par vne stipulation d'especes fut vne sorte de contracts vsuraires, & qu'il leur estoit suffisamment satisfait quand ils recepuoient pareille quantité de liures & de sols que celle contenuëe obligations.

Qui fit que du depuis le debteur ne se voyant astraint en son obligation de chose solide & finie, ains de sommes & quantitez accidentaires, desnüees de substance certaine, corps & subiect prescript, & conceuës de noms imaginaires & indefinis, à plus facilement persuadé voire astraint son creancier prendre toute monnoye qui luy estoit presentee, pour le cours que malicieusement il luy donnoit; acquittant par ce moyen vne obligation de cent liures des seules especes qu'il auoit parauant receuës pour l'acquit de quatre vingts liures seulemēt, sans que d'ailleurs il y eust beaucoup de resistāce de la part du creancier qui les mettoit à pareil prix, & ne consideroit sa leziō en l'encherissement de ses commoditez. En suyte dequoy n'a peu se continuer long temps la fabricquation des francs ou liures d'or especes, lesquels pour l'augmentation des especes estrā

geres & autres en noms de liures & sols imaginaires, il eust fallu à mesure refondre & diminuer de poids ou bonté; qui fut cause qu'elles furent incontinent hors d'usage, n'estant demeuré en leur lieu que les sols ou douzains, pour servir de pied & mesure ferme à l'instabilité desdictes liures.

Nonobstant lesquels toutesfois bié qu'ils fussent de bon aloy, mais pour le peu de perte que le peuple pouuoit faire sur iceux en comparaison du gain excessif qu'il faisoit sur les autres especes, il ne laissa d'augmenter le prix desdictes especes par lestime des douzains disproportionnez en valeur de leur fin; comme nous auons mesme veü practiquer de nostre aage en soixante & seize, que lesdicts douzains ne surhaussèrent iamais, bien que toutes especes fussent augmentees pour le moins du tiers de leur valeur, dont la cause estoit parce que nous ne contractions qu'en ceste seule espece solide. Laquelle continuellemēt noz Rois ont esté contraincts empirer, pour empescher le transport que ceste plus-valeur disproportionnee eust occasionné, s'estans au reste laissé emporter, ou à l'exemple & ruse de l'estranger, ou à l'erreur violēte du peuple au surhaussement, lequel ils ne pouuoient reparer que par la ruyne de ceux qui n'estoient cause du mal; Sans que l'on doye n'y esperer, n'y que l'on puisse imputer à leur memoire auguste, que depuis vn long temps ils ayent n'y leur

Cōseil tiré proffit du surhaussement, comme calomnieusement & ignoramment le nous impose l'auteur du liure de la Republique. Ce qui suffira pour monstrier que la premiere cause du sur-haussement a esté la deffence de contracter a especes.

Le billon

ayde & facilite au surhaussement.

La seconde est de verité estrange en sa rencontre: car comme nous venons de monstrier que le sur-haussement a produict ceste vilité & meslange de cuire aux douzains, ainsi est il veritable de dire que ce meslange excessif facilite le sur-haussement; tant pour l'occasion qu'il donne aux faux monnoyeurs de les empirer, comme nous auons dit au traicté du billon, que parce que le peuple ne le voyant plus d'argent le prise beaucoup moins, & est plus aysément induit exposer & eschanger seize ou dix-sept de tels douzains pour vne piece de quart d'escu, que si à l'œil & à la main, c'est à dire en poidz & bonté, il recognoissoit apparemment qu'elle n'en vaut & contient que quinze. Sans que ie puisse aduouër neantmoins, comme quelques vns soustiennent, que ce meslange seul soit cause dudit sur-haussement & que pour en esteindre l'vsage l'on puisse se promettre qu'il n'arriuera plus, puisque nous venons de monstrier qu'il estoit auparauât le billon, & que le billon n'est qu'un de ses effectz qu'il seroit hors de raison de soustenir auoir precedé sa cause.

Autres

causes du

I'adiousteray pour troiziesme cause du

sur-haussement que outre ce meſlange és *surhausse-*
douzains qui ſeruent ſeuls de pied ferme à *ment.*
l'inconſtance de la liure, y ayde beaucoup la
traicte ou façon plus grande au marc d'ar-
gent conuertty en ceſte petite monnoye, la-
quelle façon l'orfeure & fondeur ne priſe
pas.

Pour la quatrieſme cauſe n'y ayde pas peu *Diuersité*
la diuerſité des metaux à la monnoye qui ſe *de me-*
doit appeller pluſtoſt vne diſproportion que *taux.*
sur-haussement : Laquelle proportion pour
eſtre deſnuee de demonſtration naturelle, ne
reçoit ſa meſure & eſtimation que par leſcō-
moditez plus grâdes ou petites qu'en reçoï-
uent les hōmes par occurrēces, n'ayant touſ-
iours eſté pareille par les ſiecles precedens,
τετραπλασιασμον, dit Herodote, & à mon-
té quelquesfois iuſques à la quindecuple, &
diminuē iuſques à la ſeptuple proportion.
Qui eſt l'vnique raiſon de la pluſualeur de
de nos eſcuz, pour la facilité maintenant
de les transporter en ce traffic qui s'exer-
ce à veü d'œil, leſquels ſont ſurhausſez, ſoit
à proportion de l'argent, ſoit à proportiō du
billō, puis que pour vn eſcu l'on nous chāge
librement quatre quartz d'eſcu argent &
quatre ou cinq ſols de billon. A quoy n'y
ayde pas peu le choix & liberté du debteur
payer & acquitter ſon obligation en or ou
en argent ſans que ſon creancier y puiſſe
contredire, lequel recognoiſſant d'ailleurs
l'or luy eſtre maintenant plus commode &

recherché, le reçoit volontairement à plus haut pris par forme de composition.

*Diversité
de tiltres.*

Auquel moyen approche auçinement pour faire fin à cecy, la diuersité des tiltres qui tiennēt lieu & ont pareille incommodité en la monnoye que les diuerses especes de metaux, outre laquelle, ils cōfondent encore entre le peuple ceste science & valeur certaine des metaux en la monnoye, qui le fait esgarer aussi tost de son compte, & sans iugement ny raison priser plus ce qu'il ne sçait pas valloir moins en effect, qui donne sujet au billonneur surhausser les bonnes especes & faire profit de ceste confusion.

*Moyens de
remedier.*

*& empes-
cher le sur-
haussemēt.*

Reste donc pour consommer cest œuvre la recherche des remedes à ce dernier mal, soit enuers l'estranger, soit enuers nous. Pour le regard de celuy de l'estranger ne me semble pas que l'on y puisse apporter autres remedes que ceux que nous auons dit. Le dernier desquels qui seroit d'esgaller de nostre part nos monnoyes aux siennes, bien qu'il semble que son execution contrarie à l'opposition que nous luy entendons faire par l'application des remedes qui l'empescherōt: Si est-ce que pour ne laisser rien en arriere, & qu'il ne semble que ie tienne ce moyen resolu & arresté sans espoir de quelque autre meilleur expedient, semble à propos desdire par estat les remedes que ie me suis aduisé & par quel moyen l'on s'est cy deuant efforcé d'y pouruoir enuers nous.

Puisque

Puis que nous auons cotté le preiudice *Reparer la* dudit surhaussement regarder seul ou prin- *perte &* cipalement le creancier, qui voudroit re- *interest dis* parer plustost son interest passé que pésar de *creancier* remedier à l'aduenir, ne semble pas qu'on *pour le pas-* le peust effectuer par autre moyen, que par *se.*

la reduction de l'escu à trente cinq ou qua-
rante sols, lesquels il faudroit forger plus
forts & de hault tître, comme il semble
que quelques-vns l'applaudissent & ap-
prouuent infinimét, qui feroit que le créan-
cier qui auroit contracté en temps qu'il ne
valloit que cela auroit de verité son compte:

Mais pour c'est interest s'en ensuyuroit au-
tre iniustice & incommodités: l'vne en ce
qu'il ne seroit raisonnable que le débiteur
fust descheu de la prescription & laps de
temps introduit en sa faueur encontre son
débiteur, qui s'est contenté iusques icy du
payement à la raison de la valeur qui a eu
cours; L'autre que celui qui auroit contrac-
té depuis que lesdits escus ont cōmencé de
surhausser receuroit plus qu'il n'auroit dō-
né, ce qui seroit tres-difficile & fascheux d'a-
ualuer: Ioint à cela que le detempteur des
heritages subiects à des rétes seroit interes-
sé, en ce que sur le pied du payement qui
court de present il à puis peu prins & ache-
pté son heritage: qui seroit en vn mot l'ef- *Amende*
fect de c'est aage doré, que quelques vns *ment ima-*
nous en promettent. Car pour le regard de *ginaires*
l'amandement que l'on s'en promet, c'est vn *de noz ne-*

pur abus, par ce que bien que les choses seroient prisees par moindre quâtité de liures ou de sols, d'autant qu'ils seroient meilleurs, tousiours vaudroient elles & seroient estimees autant d'escus, quarts & demy quartz d'escu que maintenant, s'ils demeuroient en telle bonté qu'ils sont, ou en fin pareille quâtité des pecces qui ont cours: Ainsi laissant ce moyen nous parlerons de ceux que l'on pourroit proposer pour l'aduenir.

Remedier

que le sur-

haussemēt

n'arriue

d'oresna-

uant.

Quelques vns de ceux qui trauaillerent à l'ordonnance de soixante & dixsept iettant l'œil seulement sur le mal qu'ils estimoient nous oppresser lors, & ne s'estants aduisez du surhaussement de l'estranger ny d'empescher qu'il ne nous preiudiciast, soit pour n'estre lors affligéz de ce mal, soit qu'ils eurent opinion, comme i'ay veu par leurs memoires, que celuy qui surhausse sa monnoye en tire moins de son voisin, qui est abus, mirent telle peine arrester le surhaussement d'entre nous au bien & aduantage des creanciers, qu'il est difficile y rien adiouster pour leur regard. Pour à quoy paruenir, reprenant

Par con-

tracts à es-

peces.

la premiere cause que nous auôs apporté du surhaussement, ils estimerent bon remedier au mal par son contraire, & faire que tous contracts & obligations seroiēt conceuz en especes, lesquelles ne seroient qu'une d'oresnauant, & prendroit la nomination de son entier de l'or comme metal plus precieux, qui s'appelleroit escu, & toutes autres es-

peces inferieures demy, tiers, quart & demy quart d'escu, qui auroient toute fonction l'une pour l'autre soit en or ou en argent; qui est en effect le seul reglement introduit par ladicte ordonnance, le surplus n'estant que la cōfirmation des precedentes. Lequel à eu tel effect & si heureusement reüssi en ceste partie, qu'il est admirable de dire que parmy nos grādes & desesperees confusiōs, ceste chose seule des plus ordinaire à la corruption en temps calme & paisible de paix, s'est garantie du desordre; & ce pour n'auoir peu iusques icy le debteur persuader son creancier prēdre moins des peces douees de noms de fractions & parties d'escu que la quantité des entiers contenuz en l'obligation, & que douze quartz d'escu fussent plus que trois escus, esquels il estoit disertement obligé.

Mais comme les choses ne prennent leur perfection lors de leur naissance, & parauant que l'experience mere des arts nous ait fait voir leurs defectuositez, ie ne sçay si ceste grande œconomie de chez nous ne se seroit point oubliee de l'vniuerselle police des provinces de l'Europe & Affrique, que l'on peut dire ressortir de la charge, soin, police & iurisdiction des Monnoyes; & que ayant pensé seulement de remedier à l'interest seul du particulier, elle ayt ou negligé ou mal entendu le bien du general. Parce que outre ce qu'il pourroit sembler qu'elle eust peu effectuer la mesme chose par la

*Autres
moyens
d'empes-
cher le sur-
haussemēt
parmy
nous.*

fabrication de francs ou liures triples & doubles d'or; simples, demis, quartz & demy quartz d'argent, ce qui eust resisté à l'estranger par le bannissement ou amortissement de tous noms imaginaires, cōme nous auōs dit; Je ne sçay, puisque elle auoit tant à cœur remedier à nostre surhaussement, si elle se feroit point outre cela mescōtee en ce qu'elle ne fit pas que la moindre partie de l'entier qui sont sols & douzains (laissant celuy des deniers dont l'ysage est si petit qu'il ne semble pas deuoir estre en rien compté) eussent mesme denomination & fussent enoncez de noms & parolles omogenes & semblables à l'escu dont il est cōposé, ainsi qu'elle auoit obserué en ses plus grandes & mediocres parties, puisque principalement l'escu en cela auoit autresfois varié, ce qui ne se trouue point en la liure: Qui eust fait que bien tost le peuple par ceste breche se fut ouuert le moyen de surhausser l'escu & ses parties également & de mesme pas en l'achapt de ses commoditez, lesquelles, comme nous auons dit, il eust pensé moins achepter faisant valoir le quart d'escu seize sols & l'escu soixante quatre sols ou plus, qui n'impliquoit en sa denomination aucune contrarieté, S'il n'eust esté retenu de ses creanciers, lesquels il n'a iamais sçeu induire moins recevoir que les especes contenues es obligations.

*Compte a
escus ne re-
medie au
surhausse-
ment de
l'estranger.*

Combien donc que le compte a especes soit d'escus, soit de toutes autres especes que

l'on eust voulu choisir és obligations parmy nous, ayt refrené ceste ordinaire liberté des debtors de surhausser, si n'a-elle peu empêcher l'estranger que par le nom eterogene & dissemblable de sols il n'ait sans contrariété de noms qui peuuent infiniment sur le peuple surhaussé nostre monnoye propre, & facilement persuadé à nostre peuple la mise de nostre escu a soixâte cinq, six, sept & huit sols, qui luy y a fait porter a foule tant nostre or que nostre argent chez luy, d'ou procede ce mal & non de nostre peuple qui est a bout de son industrie par le moyen du compte a especes introduit par ladicte ordonnance: Ainsi qu'il se peut plus clairement voir en ce que luy ayant esté ouuerte pareille occasion de surhausser l'argét par l'exposition des sols empirez és monnoyes voisines, n'auroit peu chez nous l'effectuer que par monnoyes legeres & rōgnees, pour estre destitué d'autre matiere qui puisse suffire au payement de ses debtes.

Ce qui ne fust peut estre si tost arriué si on *Pour re-*
eust nommé lesdits douzains soixantiesmes *medier des*
d'escu ou autres nōs de parties d'entier plus *surhausse-*
commodes, qui eussent porté avec soy leur *ment de*
repugnance en cas de surhaussement, lequel *l'estranger.*
n'est a vray dire que denomination; ou que
l'on se fust seruy du nom de liures especes,
lesquelles outre le nom de liures imaginaires
quelles eussent esteint par leur solidité qui
nous preiudicient infiniment, comme nous

auons dit, eussent remedié à ce mal par la certitude & longue obseruâce de vingts sols à la liure, qu'il seroit difficile interrompre & dissuader enuers le peuple. Outre lesquels defaux puis que nous auons remarqué pour causes du surhaussemēt, Le meslange excessif de cuiure parmy l'argent, que nous appelons billō, lequel il falloit descrire; La diuersité des tiltres à la monnoye, qu'il falloit abolir: Et le brassage plus grād au marc d'argent des menues monnoyes que celui des grosses, qui se pouuoit esgaller par fai-fort des Maistres de monnoyes iusques a telle quantité que l'on eust veu raisonnable, Semble que puis que ceux de ce temps-la auoient tant a desir d'arrester le cours du surhaussement, qu'ils deuoient preuoir tous ces remedes & les faire exactement practiquer.

Henrys.

*Noms de
poids en la
monnoye.*

Et ce plustost par la fabrication desdits francs ou liures que celles des Henrys que l'on a proposé; qui n'auroient point plus d'effect & de raison que les escus. Ou que celle des especes portans noms de poids, lesquelles n'ont laissé pour cela estre empirees & affoiblies par toutes les antiēnes monarchies; & qui auroient outre cela ceste incommodité que l'or & l'argent ne pourroit pas auoir vn. nom commun & general qui eust symetrie & comparaison comme de l'entier a ses parties, parce qu'il faudroit donner mesme nom de poids à l'or q̄ à l'argent separément.

Si donc l'on eust practiqué tous ces re-

medes, ie les ose asseurer estre si singuliers contre le surhaussement, que tant s'en fault que le peuple peust alors surhausser, qu'au contraire si tant estoit que quelquesfois le bié du general nous y astraint, on ne le pourroit practiquer tant enuers nous que l'estranger que par vne refonte generale de toute la monnoye; comme nous y auroit presque necessitez ladite ordonnance de 77. qui le iugeroit necessaire maintenant.

En quoy se voit vne estrange contrariété, qui empesche infiniment quelques vns de ceux lesquels voyans veritablement le desordre, sont retenus par la difficulté d'y remedier. Et s'est la nature iouee au fait des monnoyes comme en tous les ouurages de compenser la commodité par l'incommodité, faisant que le remede d'un mal est subiect & occasion d'un autre mal. Ce qui se void en l'introduction des contracts à especes ou bannissemēt de noms imaginaires & de compte; d'autant que par iceux est de verité retenuē la liberté effreneē de nostre peuple au surhaussement, & ce pouuoir & puissance deuoluē au Prince seul qui en peut vser plus temperément, & lors qu'il en est besoing seulement, Mais aussi arriue ce malheur que ce sur-haussement ne peut estre faict que par la refonte & empirance ou affoiblissement de toute sa monnoye, puis que autrement la valeur de l'espece se rendroit imaginaire. Et par l'introduction des noms imaginaires, de

Quand est plus facile ou difficile de surhausser.

verité ceste liberté de surhausser est plus facilement prostituee & liuree entre les mains du peuple indiscret, aussi elle se fait sans ceste pénible & dommageable refonte vniuerselle.

Contracts Qui donneroit sujet à quelques vns de
a especes ou douter de l'vtilité & preference des con-
en noms tracts à especes ou en noms imaginaires, cō-
imaginai- me parauant le regne du Roy Philippes se
res compa- pourroit soustenir l'vn & l'autre auoir esté
rez l'vn à ensemble pratiqué: L'vn en la plus grande
l'autre. part des contractz fonciers & fauorables
 pour l'intereſt de tels creanciers; l'autre en
 la bouche du peuple & contracts de marchā-
 diſes, pour faciliter la reſiſtance contre l'eſtrā-
 ger par vn ſurhausſemēt imaginaire, ſans eſtre
 en peine de refondre cōtinuellement, dont
 la perte porteroit inſenſiblemēt ſur le traffic
 & tare des marchandises, pour leſquelles au
 piſ le marchand ſ'accommoderoit.

Qui ſera le lieu ou ie finiray ce diſcours que
 nous ſupplions eſtre prins de tous en bonne
 part, Ce que ie me promets meſme de ceux (ſi
 aucuns y a) qui ayant des long temps preueu
 partie de ces deſordres n'ont librement de-
 claré leur intention, Leſquels applaudiront
 ie m'aſſeure ce mien œuure & effort avec pa-
 reille demonſtration que firent les Grecs au
 theatre celui de la nation Lacedemonienne
 qui ſ'eſtoit leuee à l'arriuee d'vn bō vieillard
 à leurs reſuz.

F I N.

CONCLVSION.

57

ET parce que ce n'est assés (respondit ce bon vieillard) d'aduoier & applaudir ce qui est bon, mais qu'il faut le sçauoir faire & executer, i'ay depuis estimé a propos adjoüster icy auant que fermer ce discours la resolution des disputes que i'ay coulé cy dessus couuertement à dessein, desquelles voicy (Lecteur) que ie declare mon intentiõ, puis que la plainte que i'ay receüe de ce deffaut me donne l'assurance d'y remedier.

Ayant soustenu que les Loix sont müables par les Magistats qui ne peuuent faire serment contraire au bié public, i'ay remarqué cinq desordres ordinaires aux mónoyes. Le premier desquels est le cours des pieces legeres, dont nous auons parlé succinctement pour ne receuoir iceluy que peu de difficulté apreset, hors mis que ie soustiens que par le d'écry d'icelles le debteur est foulé si l'on ne surhausse, qui seroit contrainct rendre & restituer des pieces fortes pour des foibles qu'il a receües & auoient cours parauant, dont l'exposition neantmoins, frequente comme elle est, est vn moyen indubitable pour empescher que les monnoyes ne trauaillent iamais, & que les Maistres d'icelles puissent acchepter matieres, desquelles ils ne peuuent donner telle quantité de monnoye pour chacun marc que les autres artisans qui trauaillent de ces metaux;

H

attendu que lesdits artisans payent lesdites matieres en monoyes legeres qui ont cours, au lieu que lesdicts Maistres de monnoyes ne les peuuent payer qu'en celles qu'ils fabriquent qui sont & doiuent estre de poids, Enquoy consiste l'imaginaire encherissement du marc d'or & d'argent que nous nous proposons. Et ressus pour ce regard qu'il seroit meilleur surhausser les fortes que permettre & toller l'exposition des legeres à mesme prix; puisque l'un & l'autre n'estant autre chose qu'une diminutiō du deub des creanciers, telle tollerāce a (outre ceste decharge) l'incommodité que nous venons de dire au chommage perpetuel des monnoyes, & autres incommodités qui se peuuent coter.

Quand est du second desordre qui concerne les pieces fausses & alterées, nous auons declaré nostre intention en son lieu.

Pour le troisieme qui contient le Billon, & alliages des Metaux en la Monnoye; I'ay dit que le Billon n'est si pernicieux & dangereux que l'on le fait, qu'il afflue par sa haute exposition, qu'il se transporte par sa plus basse, & se conserue par son egalité comme toute autre monnoye.

Et quād aux alliages, Je soustiens qu'il se faut bien garder se laisser emporter, en faict d'Estat, au conseil de ceux qui voudroient par des comparaisons d'aage doré & pureté de Monnoye tirer vne consequence des mœurs,

qui ne furent iamais si corompües que depuis que les hommes & prouinces ont eu le moyen de se seruir de riches & purs metaux ; Mais prenant la raison d'ailleurs, que nostre prouince sterile comme elle est de ces mines, & située au milieu des billonnements estrangers qui l'enuironnent, doit estre mediocre en ce meslange, qui cōserue indubitablement vne Monnoye & empesche que le billōneur ou artisan ne soit friand de la fondre par les frais qu'il souffre en l'affinage, qu'ils appellent aage plus grād ; Enquoy l'auserois resoudre que nos Peres ont esté plus sages en la fabriuation de nos testons que n'auons esté en celle des quarts d'escu, qui est nouuelle & ambitieuse, propre a prodiguer follement nos richesses si nous ny remedions par prix tres excessif.

I'ay insisté d'auantage sur le quatriesme desordre sans aufer en mon Traité esclaircir mon intention que voicy. Ayant fait double penurie, l'vne d'or & argent mōnoyé, l'autre de matiere simplement, Ie dy que la penurie de monnoye en comparaison d'or fauerie vient de la raison que nous auons aduertie au cours des pieces legeres ; Ioint a icelle la tollerance du prix excessif és façons de l'orfeure, qui luy dōne moyé d'achepter nos mōnoyes pour refondre. Et quād a la penurie d'or & d'argent en general, Ie n'ay obmis les plus ordinaires moyés dy remedier és
pages 21, 22, 27, 28, Entre lesquels le plus im-

portant est d'empescher que nous receuions moins qu'il sera possible destoffes & ouurages estrangers, & leur en donner le plus que nous pourrons des nostres, qui est vn moyé de verité tres necessaire maintenāt, dont les nations plus steriles s'enrichissent a nostre honte. Mais i'adiouste que la police & science des monnoyes peult infiniment en ce trafic, & que puis que les Prouinces contestēt l'vne contre l'autre qui tirera plus de ces metaux, il se faut biē garder de croire que tout pais a besoin de certaine quātité de necessités & denrées desquelles il ne se peut passer & n'en peut estre chargé en vn temps plus qn'en l'autre ou s'en pouruoir ailleurs, ce qui est plain derreur & contraire à l'experience des années precedentes fertiles en fruićts & denuées de peuple chez nous, qui nous debuoiēt donner moyen de nous enrichir au lieu de la penurie que nous souffrons; Ce qui nous doit faire veiller a ne diuertir le marchāt estranger de lachapt de nos fruićts, & ne l'allecher au traffic d'or & d'argent auquel il gaigne beaucoup plus. Et tiēs pour ferme resolutiō que l'vn & l'autre est ineuitable par vne moinsvalleur d'or & d'argēt chez nous que és pays circonuoisins entre marchās; nonobstant la rigueur des ordonnances au transport, esquelles seules il est dāgereux de s'asseurer en chose si preiudiciable & en pays de si facile contrauentiō que le nostre par ses aduenues ouuertes de

toutes parts, Enquoy il faut sur tout arrester le present, & sur l'esperance vaine d'une perseverance ne demeurer abandonnez de secours, Et ne se reigler sur la police ambitieuse d'Espagne qui ne vaut rien a conseruer des richesses, comme en effect elle ne s'y efforce point, ne le pouuant esperer par sa sterilité.

Et parce que telle moinsvalleur notoire chez nous de present, ne sembloit pas pouuoir estre reduite que par vn surhaussement, l'ay a mondit Traicté parlé du Surhaussement comme du cinquième & dernier desordre que ie ne repeteray icy, Mais y adiousteray seulement ceste miene derniere intétion, Sçauoir en premier lieu que la proportion de valeur entre l'or & l'argent a esté de tout temps variable & n'a nul fondement en la nature, mais se regle sur la commodité moindre ou plus grande que les hommes en peuuent receuoir par occasions esquelles la prudence politique se doibt accommoder selon la necessité; Qui me contraint de soustenir que de present l'or deust vn peu estre augmenté de prix enuers nous par dessus l'argent, pour la facilité au transport qui a lieu de present plus que iamais par la faute que nous auons d'artisans & manufactures. Sás que ie puisse aduouer que la disproportion de prix de noz monnoyes entre elles puisse seule causer vn transport, ains la plus valeur que leur don-

ne l'estranger plus que nous, lequel neantmoins choisit celle des nostres qui luy est plus aduantageuse, ce qu'il ne feroit pas si (quelque inegalité quelle eust entre les nostres) il la prisoit aussi peu que nous en son commerce d'or & d'argent qu'il nous faut sur tout retrancher.

Et d'autant que pour y paruenir il est besoin premierement de resoudre comme tel trafic se fait & pratique par vne plus valeur; Comme i'aduoué qu'indubitablement nous ne deuons priser la monnoye de l'estranger plus que la nostre, parce que ce luy feroit donner vn moyen de conuertir la nostre en la sienne qu'il nous rendroit en moins de matiere a nostre pure perte, Ainsi ie soustiens que outre ce billonnement ledit estrange se sert d'un autre moyen pour attirer nostre argent sans nous donner du sien, Ce qu'il fait par vne permission & tollerance d'acquitter vne mesme obligation chez luy en moindre quantité d'argent que chez nous, par l'artifice des reductions de cedulles en florins, liures & tous escus que le marchand estime estre equipolents, qui se trôpe; Ce qui alleche & l'estrange de levenir querir icy, & attise nostre propre marchand de luy faire porter, lequel trafiquant en deux endroits choisit de faire tenir son argent à celuy qui le prend a plus haut prix, & surcharge l'autre de ses marchandises, Qui est le seul secret de ceux qui

traficquent a transporter, & lequel aucuns de nos antiens historiens ont touché lors qu'ils ont dit Que pour attirer l'argent de nos voisins nous leur en donnions la six ou douzième partie; auquel eschâge ils n'eussent pas beaucoup gagné si nous ne l'entendons de ceste descharge industrieuse d'obligation, qui est la vraye difinition du Surhaussement. Sans laquelle descharge il nous seroit facile d'interdire tout trafic d'or & d'argent par la defence seule d'exposer toutes pieces estrangeres plus que les nostres; Ce que partant i'estime ne suffire, parce que telle deffence n'oste le moyen d'attirer nos monnoyes sans nous rendre des estrangeres, ce que nous auons monsté pouuoir estre executé par l'industrie cy dessus, qui nous espuise petit à petit insensiblement; & moyennant laquelle il n'est plus besoin nous informer de ce dont on nous peut payer en eschange; pour estre cela trop facile pourueu que l'un & l'autre marchand y consente & conspire pour son profit, & faut peu de denrees superflues & contracts de commodité pour espuiser tout l'or & l'argent de la France.

Restant donc seulement de chercher remede a ce mal, l'aduouë pour mon regard ingenuement que ie n'en puis trouuer autre Qu'en faisant mesme descharge & composition és obligations des marchans chez nous que fait l'estranger chez luy; à ce que

ceste pareille grace leur ostant le desir de faire porter leur argent dehors & le moyen d'y profiter qui force & contraint le libre cōmerce, ce trafic d'or & d'argent prenne fin, & que ledit marchand se donne tout entier au commerce des marchandises, sur lesquelles il aura esperance de hazard & non sur celui d'or & d'argēt qui sera entierement leuē par ceste egalitē de payement en ses obligations.

La difficultē gist en l'execution, en laquelle semble se presenter double cōtrarietē. La premiere que tout ainsi que ceste decharge pareille conserue nos richesses, ainsi faut il ingenumēt aduouer quelle fait preiudice au creätier & ne luy rend son cōpte, Ce qui nous doit en ceste cōtraire rencontre redre tēperez au remede, & estimer aussi pernicious suiure ledit estranger a val de route en ceste descharge, cōme l'on s'est monstré trop curieux en la conseruation de l'interest seul des riches creantiers au preiudice du general, par la Loy fondamentale de n'admettre iamais surhaussement a l'aduenir en l'ordonnance soixante dixsept dont tous les reglements ne tendent qu'a cet interest. La seconde, que d'ailleurs comme tel surhaussement ne peut estre facilement executē de temps en temps que sur le compte des noms imaginaires, esquels il reduit en fin les especes plus solides par sa continuation, comme il auoit fait les liures & francs qui estoient

estoyent premieremēt especes; ainsi est il vray de dire que le compte en noms imaginaires facilité trop le surhaussement effrené par le peuple au preiudice desdits creantiers.

Pour temperer lesquels inconueniens j'auois proietté en mon Traicté vne fabrication nouvelle d'escuz d'argent de trois liures, affoiblis de poids & empirez d'alloy, subiects a refondre & diminuer dorenavant par ordonnance publique seulement quand l'on verra qu'il en sera besoing, qui s'appelleront monnoye courante en laquelle le marchand contracteroit seulement; a ce que au moyen dicelle, qui nous seruira pour surhausser, nous puissions luy oster le subiect qu'il a de transporter, puis que c'est luy seul qui nous espuise. Outre laquelle fabrication seroit continuée celle qui a cours qui s'appelleroit monnoye forte, en laquelle il seroit seulement permis de contracter es ventes & achapts de biens immeubles, gaiges, pensions & domaines, qui seroit solide & perpetuelle pour desinteresser les fauorables creantiers aux surhaussements, Lesquels nous auons verifié n'auoir autre in commodité que ceste seule descharge, entre infinis inconueniens que l'on s'est figuré sans subiect En vn encherissement imaginaire, En l'opinion que nous receueriōs lors moins de matieres de l'estranger, En la diminution des biens & facultez d'vn chacun (qui est vn abus au regard

du debteur qui gaigne ce que perd le creancier & n'emporte rien dehors) Bref en vn aage doré par la reduction de l'escu a xxxv sols, & autres discours que ie refuse : Estant tout certain que toute la deliberation du surhaussement consiste au seul interest des creantiers, pour lequel seul il est estrange que quelques vns de ceux qui ont en depost de leur soing & vigilance la conseruation des richesses du Royaume se travaillent infiniment ; au lieu que les compagnées qui ont la distribution du droit & iustice des particuliers & mesmes les provinces entieres passent doucement cest interest pour le respect du general.

En laquelle nouvelle fabriuation que j'introduits, trois choses semblent nous rencontrer heureusement pour ceste fois. La premiere que nous ne gastons rien, & ne faisons preiudice a l'intention de l'ordonnance de soixante dixsept, au moien des escus especes a trois liures esquels nous contracterons tousiours pour seruir de pied ferme a l'encontre du surhaussement populaire, & sera en nous de ne plus surhausser d'auantage si nous ny sommes necessitez. La seconde qu'apres telle confusion d'estat qui nous a precedé Il semble necessaire de faire quelque descharge aux debtors qui nont receu aucune grace iusques icy, ce qui rend les biens de toutes les familles que les troubles ont surprises tant soit peu

endebtéés, venaux & abandonnés ; En fa-
ueur de laquelle decharge tous les surhaus-
sémens antiens ont esté introduits par les
meilleurs Princes & Empereurs , sans que
l'antiquité aye iamais sceu que cestoit de
surhausser ses monnoyes sinon pour ceste
seule occasion, Comme d'ailleurs elle a con-
tinuellement surhaussé de temps en temps
a ce subiect, iusques a auoir reduit la liure
pesant d'or & d'argent en celle de xx sols
dont nous vsons : n'ayant par sa naturelle
douceur estimé raisonnable que la tare
des monnoyes qui se minent & affoiblissent
par le tēps, fut portée par le debteur es nou-
uelles fabrications & refontes de pieces le-
geres , pour lesquelles , si l'on ne surhaus-
soit, il seroit contraint en rendre & restituer
de fortes, Qui est vne consideration qui ren-
uerse la Loy fondamentale de soixante dix-
sept de ne iamais surhausser à l'aduiér, laquel-
le consideration a eu lieu lors mesmes que
les Princes n'ont esté meuz ny forcez de ce
faire pour remedier au transport comme de
present ; Qui est vne autre raison laquelle
rend ceste forme de descharge preferable a
toutes autres reductions des debtes que les
Loix ont de tout tēps esteintes lors que les
arrerages auoiēt payé deux fois le fort prin-
cipal. *l. si non sortē. ff. de condict. indeb. & tot. tit. de
usuris.* La troisieme récōtre en cecy est qu'e-
stāts necessitez de remedier aux pieces lege-
res, pieces estrāgeres, pieces forgées d'un coin

faux & tefmoin de rebellion, & a autres desordres, la tare & perte de tous ces reglemens est en vn surhaussement & plus iustement portée par le riche creantier par tout droict d'humanité, & plus seurement imposee de ceste façon pour la crainte que par vn tel d'escry l'on ne transporte lors a outrance dont ledit surhaussement nous releueroit.

Voyla (Lecteur) le secret de mon intention, que i'ay mis pour ce coup au iour non pour en opiniastrer l'execution, mais pour le seul desir qui me tient de faire veoir la verité de ceste science & enquoy consiste son interest ou non, affin de leuer du milieu de plusieurs les opinions & principes que i'ay veu tenir en telles disputes, eslongnés de toute apparence & pureté de discours.

FIN.

